

1 Korin

Agau e nugau zebigeg

Pol go Epesus uzan daimai, agau e Korin duailel sikut wai mareun. Korin uzan go Akaia agaig ebu dareu. Uzan go Grik duailel asiu daremen. Zuda duailel go han go ebu daremen. Getal Pol go uzan go betei daimai, Uwait nugau Ze abai marena, duailel go ebuan asiu goagal oiagab Yesus en petak emen. Korin uzan duailel ipal ag ecesab asiu mui, bo, ag igul eg asiu macanemen. Ag wal igul maimai, polu wes ulagwag mai daremen. Pol nug Kristen duailel ag en dabeleimai, ag igul go i mabun aimai sikut wai mareun. Agal oiagab Yesus en petak emen gusig patai damam aimai awareun.

Agau e sesamorabun ze

- 1:1-9 Pol nug Korin duailel awareun.
1:10-4:21 Pol nug Kristen duailel agzozou atalaimai, beu beu salau macanemen en ze awareun.
5:1-7:40 Duailel ipal ag wal igul macanemen, Pol nug ag koli Uwait nugau Ze sesamoraimai, suban dabun aimai awareun.
8:1-11:1 Kristen duailel mui, polu wes ulagzanemen duailel mui, agal ze.
11:2-14:40 Kristen duailel ag erunaimai, Uwait nugau salau moroimai, gonugau wanib ulagwag muramamen.
15:1-58 Yesus Kristus go noumaimai, koli waseun sul duailel ag han koli asamamen.
16:1-4 Yesus en oiagab petak emen duailel Zudia* agaig ebu uhu oi darena, duailel ipal agen aiwag gotulaimai, ag isanarabun ze.
16:5-24 Pol nug ze ipal nug en ze maimai, gonugau ze poeun.

Pol nug Korin uzanan Kristen duailel sikut wai mareun.

1 ¹O zaiar, Korin uzanan Kristen duailel, iz Pol, Uwait nugtal iz Yesus Kristus nugau ze oi aidabun tapai mileun, igual zaicig, Sostenes go ereg iz ibail daimai, iguan ag sikut wai marem.

²O zaiger, sikut e iguan ag Kristen duailel Korin uzan daremen palautai marem. Ag Yesus Kristus dual pezai daremen, gonun, Uwait nug gonugau duailel naliu tapai mareun. Go ag mui duailel unum em e ebu

igual Dubanou Ban, Yesus Kristus nugau wanib ulagzanemen abai ereg gonugau duailen naliu dabun ulareun. Yesus Kristus go ig ag abai ereg igual Dubanou Ban.

³Iz Uwait guzenai auranem, go igual memenig mui, igual Dubanou Ban, Yesus Kristus mui agal oiagab naliu eiman ag isanarebi, agal oiagab selai damamen.

⁴Iz umkoskos ag en izal Uwait 'Ese-e' auranem, einen, ag Yesus Kristus dual pezai darena, go nug ag gonugau ougab naliu eiman suban isanareun. ⁵Iz ag en Uwait 'Ese-e' auranem, einen, go nug ag isanaraimai, ece unum maraneu. Dabeleu naliu marena, ag gonugau ze naliu abe maimai, duailen ipal awaranemen. ⁶Kristus nugau ze agal oiagab oug gusig dareu. Duailen agal igul uligaimai, ag Kristus nugau ze go petak em. ⁷Gonun, ag ulis, igual Dubanou Ban, Yesus Kristus koli araog alabun gumeimai, ag ece unum agal doropag isanarabun mui go darem. Uwait nugau Ah Wes nug ece go umkoskos maraneu. ⁸Yesus nugtal agal oiagab petak emen gusig maraba, ag gusig tapai dabiag, em tamabun ziwas alamau. Guzenaimai, igual Dubanou Ban, Yesus alamau ziwas ebu, agal wanimag ebu ze tub i damau. ⁹Uwait nug ag gonugau nag, igual Dubanou Ban, Yesus Kristus dual gotulabun ulareun. Uwait nugtal gonugau ze unum muzmuz sesamorneu, gonun, ig abiu go nug ig suban gumigina, ig Yesus dual naliu damam.

¹⁰O zaiar, igual Dubanou Ban, Yesus Kristus nugau wanib ebu iz ag gusig ze awarem, ag unum ze tutak macan. Ag beu beu i atalan. Oiagab tutak a mui, dabeleu tutak a mui, suban dan. ¹¹O zaiar, Kloe nugau zauem dacanemen dudu ipal alaimai, agen ag oiagab tutak tamacag dacanemen, agzozou ze eim alalanemen ze ailemen domin. ¹²Ze go doimai, iz ze e awaramoroi. Ag tutak tutak ze ata atai macanemen. Ipal agen enanem, "Iz Pol sesamoranem." Ipal agen enanem, "Iz Apolos sesamoranem." Ipal agen enanem "Iz Pita sesamoranem." Kolital ipal agen enem, "Iz Kristus sesamoranem." ¹³Ag igul go guzenaimai, go ag Kristus ginampet sul beu beu atalanemen. Bo, iz Pol agal igul eg zilagai marabun a gegeulanau ebu noumemin ta? Ag izal wanim ebu gagaliag patemenin* ta? Tam pet, tam.

¹⁴Iz ag ula duailen asiul ebesil gagaliag patab tam. Iz Krispus, Gaius dual tutak gagaliag patemin. Gonun, iz Uwait 'Ese-e' auranem. ¹⁵Guzenaimai, du tub nug ag izal wanib ebu gagaliag patemen aimai i ze mamau. ¹⁶(O, go petak, iz Stepanas nugau ug han gagaliag patemin. Iz duailen ipal izal ebesil gagaliag patemin ta, tam ta, iz dabelabun iborain tam.) ¹⁷Kristus nug iz duailen gagaliag patabun palautilab tam, iz gonugau Ze Naliupet duailen awarabun palautileun. Izal ze dudu agal ze awaranemen sul tam. Ze go dudu agal dabeleu eiman alab tam. Iz gaul dudu agal dabeleu sesamoraimai, ze memmin zob, Yesus Kristus a gegeulanau ebu noumeun salau gonug ig isanigab tam.

Kristus go Uwait nugau dabeleu naliu mui gusig mui patai dareu.

¹⁸Iz abiu, dudu go ag tamabun abu ebu darem, agen Yesus Kristus go a gegeulanau ebu ag imarabun noumeun ze go doimai, agal dabeleu go kar weun du nugau ze aimai ze memen, bo, ig duail el go nug koli imaigeu go ig abiu, ze go Uwait nugau gusig a. ¹⁹Uwait nugau ze getal sikut wai memen go guzenai dareu, “Iz abiu macanemen dudu agal dabeleu naliu oiai. Iz dudu ag dabeleu naliu mui anemen agal dabeleu eg marai.”

Aisaia 29:14

²⁰Gonun, abiu macanemen dudu go ag erunamamen? Kasai ze abai maranemen dudu go mui em e ebuan dudu ze eim alalanemen mui ag erunamamen? Dudu go Uwait nug em e ebuan dabeleu go naliu tam, dudu go agal dabeleu kar wageun dudu sul patarai meun. ²¹Uwait nugau dabeleu naliu pet, gonun, em e ebuan duail el agal dabeleu eim go abe murabun iborain tam. Agal dabeleu gonugau ze duail el awaranem ze go kar weun du nugau sul, bo, Uwait nug ze go eim duail el agal oiagab petak emen imarabun gonugau ougab siksikaneun. ²²Zuda duail el ag gugeg beu beu piabun guzenanemen. Grik duail el ag dabeleu naliu uabun guzenanemen. ²³Bo, ig Kristus a gegeulanau ebu noumeun nugau ze awarai darem, ze go eim Zuda duail el Uwait waugab bitabun abu tapelai maraneu. Emgasag ipal ebuan duail el agal dabeleu ze go kar wageun dudu agal ze sul. ²⁴Bo, duail el go Uwait nug Yesus sesamorabun ulareun, ag Zuda duail el ta, Grik duail el ta, ag abiu go Kristus nugau ze, Uwait nugau gusig mui, gonugau dabeleu naliu mui go eiman aleun. ²⁵Dudu agen Uwait nugau dabeleu go eg aimai semuranemen, bo, du go nugau dabeleu, go nug em ebuan dabeleu unum zilarai dareu. Dudu agen Uwait nugau gusig ginampet anemen, bo, gusig go ginampet nug dudu agal gusig unum zilareu.

²⁶O zaiar, ag ulis dabilan, ag getal erunai pet daremen ebu Uwait nug Yesus Kristus sesamorabun ulareun go koli dabilan. Ag ula ebu, dudu asiu em e ebuan dabeleu naliu mui i darem. Dudu asiu ag ulapagwag mui han i darem. Dudu asiu ag dudu banban agal ug ebuan zuab tam. ²⁷Bo, abiu duail el Uwait nug aipag nuabun aimai, abiu tamacag duail el tapai mareun. Go duail el gusig a aipag nuabun aimai, duail el gusig tamacag tapai mareun. ²⁸Duail el inen em e ebu, duail el ipal agal dabeleu ag naliu tam, ag duail el go gasag maranemen, Uwait nug duail el go tapai mareun. Go duail el wanimag tamacag tapai mareun. Gonun, ein ece duail el agen go banou aimai dabilanemen, Uwait nug semareun. ²⁹Guzenaimai, du tub nug nugtal gonugau wanib Uwait nugau ameg ebu wag mabun iborain tam. ³⁰Uwait nugtal ag Yesus Kristus dual pezai mareun daremen. Gonug Yesus ig dabeleu naliu migabun bigegwai migeun dareu. Yesus Kristus nugtal ig Uwait nugau ameg ebu duail el

tugui ai aigaimai, gonugau igul naliu sesamorai aidabun tapai migeun. Yesus Kristus a gegeulanau ebu noumeun, gonun, Uwait nug igul igul eg ebuan imaigeun. Guzenina, igul eg gonug ig koli gumigabun iborain tam. ³¹Gonun, Uwait nugau ze aneun sul, go guzenai aneu, “Du in gonugau salau meun en gonugau wanib ulagwag mabun dabeleu, go Dubanou Ban nug go salau mabun gusig moroun dabeleimai, Dubanou Ban nugau wanib sag ulagwag mamau.” *Jeremaia 9:24*

Kristus noumeun ze.

2 ¹O zaiar, iz amegai ag waiagab alemin ebu, Uwait nugau Ze wageimai dareun ag awaremin. Iz ag ze dudu dabeleu asi mui agen ze maranem sul awarab tam. ²Iz guzenai dabelemin, iz ag ula daimai, iz ecesab ipal en dabeleimai, ag i awarai. Iz Yesus Kristus go a gegeulanau ebu noumeun sag dabeleimai, awarai. ³Guzenaimai, iz ag waiagab alemin ziwasi ebu, iz gusig tamacag, iz guarguaraimai, uminai mui daremin. ⁴Iz Yesus nugau ze maremin go abiu macanemen dudu ipal goagal dabeleu eiman agal dabeleu kekulabun aimai awaranemen sul awarab tam, bo, Uwait nugau Ah Wes gonugau gusig nug izal oisau gusig mileun, gonun, ag abiu memen go Uwait nugau Ze marena, domen. ⁵O zaiar, iz igul go guzenemin, einen, izal dabeleu agal oiagab petak emen go Uwait nugau gusig sag ebu macan, abiu dudu agal dabeleu i sesamoran.

Uwait gonugau dabeleu go naliu.

⁶Bo, ig awaranem, ze go dabeleu naliu eiman zuna, awaranem. Duail el ag Uwait nugau igul eiman gusig memen ag igul ze go awaranem doimai, abe memen. Bo, ze go naliu ag abe memen, go em e ebuan abiu macanemen dudu mui, em e ebuan dudu banban mui, agal dabeleu eiman zuab tam. Dudu go unum tamamam. ⁷Tam pet tam, ig Uwait nugau wagem eun ze gonugau dabeleu naliu eiman zuaneu awarem. Getal Uwait nug em e patai mab tam ebu, gonugau dabeleu naliu eiman ig go dual Mesgai wag suban dabun tapai migeun. ⁸Em e ebuan dudu banban ag ze go naliu i abiu, einen, ag go abe memen zob, ag igul Dubanou Ban go wanib ulagwag mui a gegeulanau ebu i asai memen zob. ⁹Bo, Uwait nugau Ze getal sikut wemen guzenai aneu, “Ein ece du tub ameg nug getal piab tam mui, ece dabug nug duab tam mui, ein ece aiu ses zumau i dabilaneu, ece naliu pet go Uwait nug duail el go en oiagab noumemen uabun tapai mareun dareu.” *Aisaia 64:4*

¹⁰Bo, Uwait nug gonugau Ah Wes nug ig ece go araog abai migeun.

Uwait nugau Ah Wes nug ece unum wageimai darem itanaimai, piaraneu. Uwait nugau dabeleu wageimai dareu han go araog pianeu.

¹¹Du tub nug du tub nugau dabeleu erunai pet dareu go abe murabun

iborain tam. Tam pet, tam. Du gonugau wes nugtal du go nugau dabeleu erunai pet dareu abe macaneu. Gonun, du tub nug Uwait nugau dabeleu erunai pet dareu i abe macaneu. Uwait nugau Ah Wes nug sag Uwait gonugau dabeleu erunai pet dareu abe macaneu. ¹²Ig em e ebuan wes uab tam, ig Uwait nug gonugau Ah Wes migeun omun. Guzenaimai, ig Uwait nug ein ece gaul migeun unum abe mabun iboin.

¹³Ze e naliu ig ag awarem, go dudu agal dabeleu ebuan oimai, awarab tam. Uwait nugau Ah Wes nugtal ig abai migena, ag ze go awarem. Ig Ah Wes enugau petak ze duaillel Ah Wes mui awaranem. ¹⁴Bo, du tub go Uwait nugau Ah Wes uab tam, go ece naliu Uwait nugau Ah Wes eiman alamau go i umau. Einen, gonugau dabeleu ece go bigegwai tamacag, go ece gonugau bigegwai abe murabun iborain tam, einen, dudu Ah Wes mui ag sag gonugau bigegwai abe mabun iboin. ¹⁵Du tub go Ah Wes mui go ece unum uligaimai, sisiraneu, bo, du tub nug du go nugau igul sisiabun iborain tam. ¹⁶Uwait nugau ze guzenai aneu,

“Inug Uwait Ban nugau dabeleu abiu meu? Inug go dabeleu naliu murabun iboin?”

Aisaia 40:13

Em ebuan du tub nug guzenabun iborain tam.

Bo, igual dabuigeleu go Kristus nugau dabeleu sul.

Ig Uwait nugau salau macanem duaillel.

3 ¹O zaiar, iz ag dudu Uwait nugau Ah Wes mui awaranem sul awarab tam. Iz ag em e ebuan duaillel igul eg macanemen sul awaremin. Ag duaillel ulistal oiagab petak emen sul, gonun, iz ag mogoi ginaginam sul awaremin. ²Iz ag mogoi ginaginam sul ap sag maremin, ee gusig marab tam, einen, ag ee gusig zabun iboin tam. Ulis han ag ee gusig uabun iborain tam. ³Einen, ag em e ebuan duaillel sul danemen. Ag agzozou wanimag ze ebalagab maimai, alalanemen. Petak pet, igul go guzenanemen go em e ebuan igul. ⁴Ag beu beu atalaimai, ipal agen enem “Iz Pol sesamoranem”, ipal agen enamam, “Iz Apolos sesamoranem”. Go ag em e ebuan duaillel agen guzenanem sul guzenamamen.

⁵Ag suban dabilan. Apolos go in? Pol go in? Ig gaul Uwait nugau salau dudu aliag, Dubanou Ban nug gonugau salau ag oiagab petak abun aimai tapai migeun. Ig iguatal igual salau atai memun. ⁶Amegai izan ee ug wemin, Apolos nug ulis ee ug gumaneun, bo, Uwait nug ee ug go gusig morona, walu zuaneu. ⁷Du in nug ee ug baneu ta, du in nug ee ug gumaneu ta, du go banou tam, bo, Uwait nug ee ug go gusig morona, walu zuaneu, go sag banou pet. ⁸Du in nug ee ug baneu, du in nug ee ug gumaneu, ag ereg Uwait nugau salau sag macanem. Uwait nug aiu ses dudu go ein salau memen guzenaital ece beu beu maramau. ⁹Ig ereg Uwait nugau salau sag macanemun. Ag Uwait nugau ougem.

Ag han Uwait nugau zau. ¹⁰Uwait nug gonugau ougab naliu eiman iz isanilena, zau naliu mabun abai milena, iz zau sanag zau naliu

macanemen dudu agen gusig macanemen sul patai dabun hei betemin. Dudu ipal agen sanag go ebun zau mai daremen. Bo, dudu tutak tutak ag subantal sanag go ebun zau mamamen. ¹¹Uwait nug Yesus Kristus ulacan zau sanag gusig sul tapai meun dareu, gonun, du tub nug ulacan zau sanag awau tapai murabun iborain tam. ¹²Dudu ipal ag zau sanag go ebun zau mabun aiwag naliupet ta, aiwag gol* ta, silva* ta oimai, zau gusig macanemen. Bo, dudu ipal ag a ta, amam gau ta, gig ta oimai, zau macanemen. ¹³Sisiarabun ziwasi ebun, du nugau salau erunai pet macaneun, ig araog pimam. Gonugau salau ab nug patai pimau, gonun, gonugau salau naliu ta, eg ta, araog abai migamau. ¹⁴Du tub gonugau zau sanag go ebun meun ab nug i elaba, go ece naliu umau. ¹⁵Bo, du tub nugau zau unum ab nug elaba du go nugau salau unum tamamau. Zau atag du go nugau Uwait nug imaba, go unum eg usalab tam, bo, go ab unig eiman utei uminai waneun sul.

Ig Kristen duailen Uwait nugau Nou Zau banou.

¹⁶Petak pet, ag abiu, Uwait nugau Nou Zau banou go ag sag. Uwait nugau Ah Wes agal oiagab oug dareu. ¹⁷Gonun, du in nug Uwait nugau Nou Zau eg wamau, Uwait nug koli go eg muramau, einen, Uwait nugau Nou Zau go gonugau pet usalai meun. Ag go Nou zau banou.

Ig dudu agal wanimag ulapagwag i mab.

¹⁸Du tub nugau gonugau enib ebun ze i polu ze mamau. Du tub nug, ag ula, gonugau em e ebun dabeleu eim izal dabeleu naliu mui aimai, wanib wag maba aimai, iz ze go auramoro, “Amagai na kar neweun du sul usalai dan. Na aiu ses dabeleu naliu mui damam.” ¹⁹Einen, em e ebun dabeleu, Uwait nugau ameg ebun naliu tam, kar weun du nugau sul. Uwait nugau Ze getal go enai aneun, “Abiu macanemen dudu ein igul mabun dabilei darena, Uwait nug pigai alaimai, goagal dabeleu eg abai maraneun.”

Job 5:13

²⁰Kolital, Uwait nugau ze nug guzenai aneun, “Ban go abiu, em e ebun abiu macanemen dudu agal dabeleu ginampet, ag ein salau mabun dabilanemen, go naliu i usalamau.”

Buk Song 94:11

²¹Gonun, du tub nug, em e ebun dudu agal wanimag wag i mab. Uwait nug ag ece unum mareun. ²²Gonug Pol, Apolos, Pita, goagen ag isanarabun mareun. Em e mui, awau dabun igul mui, noumabun igul mui, ece ulis dareu mui, ece aiu ses zuabun emen, ece go unum agal. ²³Ag Kristus nugau, Kristus go Uwait nugau.

Uwait nug ig Yesus Kristus nugau salau oi murabun uligeun.

4 ¹Gonun, duailen ag abiu macan, ig Kristus nugau salau dudu, iguan Uwait nugau petak ze wageimai dareu araog mai aidabun

tapai migeun. ²Salau dudu agal salau mabun gusig ze guzenai, go gonugau gumanau du nug ein salau mabun auraba, ze suban doimai, sesamoraimai, salau macaneu. ³Agen ta, em e ebuan duailen ta agen izal igul sisiamam, iz go en dabeleu asiu i om. Ag don, iz izanag izal igul i sisianem. ⁴Iz i abiu, igul eg tub guzenemin ta, tam ta, bo, iz unum igul naliu manem aimai ze mabun iborain tam. Dubanou Ban nug sag izal igul sisiai milaneu. ⁵Gonun, o zaiar, igual Dubanou Ban koli alabun ziwasi zuau dareu ebu, duailen ipal agal igul pigai i sisianem. Go alaimai, ein ece umaum wageimai dareu al ebu araog mamau. Go ein dabeleu dudu agal oiagab oug dareu araog mamau. Guzenaba, Uwait nug duailen ein salau memen guzentan agal wanimag ulapagwag guzenaitan maramau.

⁶O zaiar, ag don, iz ag isanarabun ze go iz Apolos dual en awaranem. Gonun, go, iz ag abai maremin, ag ze gonugau bigegwai abiu mamamen. Ze go nug guzenai aneu, “Uwait nugau Ze sikut wemen go dareu, go tutak sesamorab, ze tubtub mui i tulani.” Gonun, du tub nug ag ula du tub nugau wanib wag maimai, “Du e go naliu”, “Du ulibe go du naliupet tam” guzenai i ze macan. ⁷In nug na du banou tapai mizeun? Na ece tutak patai darem, go Uwait nug i mizeun ta? Uwait nug na ece unum mizeun. Gonun, na einen nait wanim wag maimai, izal gusig eiman ece omin aimai ze mem?

⁸Agal dabeleu, ag ece unum agal doropag isanarabun mui, ag ece asiu mui, gonun, ag siksikai daremen? Agal dabeleu ag emgasag gumanemen dudu banban sul tapai daremen ta? Agal dabeleu ig guzenai i darem ta? Izal dabeleu petak ag emgasag gumanemen dudu banban usalebi, ig ag abai ereg emgasag gumamam, go naliu. ⁹Bo, izal dabeleu guzenai, Uwait nug ig gonugau ze oi aidabun dudu ses pet migeun. Gonun, ig hiacaranem zau ougan dudu wagarina, noumanem sul, dudu agal ameagab ebu mui Uwait nugau amegwab aidarem.

¹⁰Ig Kristus en oigeb petak emun, gonun, agen ig karigweun dudu aimai aiganem, bo, ag Kristus en oiagab petak emen agen ag dabeleu naliu mui aimai aiganemenin. Agen ig gusig tamacag aimai ze manem, bo, ag ig gusig mui aimai ze macanemen. Agen igual wanimig wag i miganemen, agal wanimag sag wag macanemen. ¹¹Ig getal alalai ulis, ig ee ze mui asiu i zanem, we aidanem. Ig tibur galau eg bigageun mui tugai aidanem. Ig dudu agen esalau sul iguanem. Ig zau tamacag, gaul ipal agal zau gabuai aidanem. ¹²Ig iguatal igual ebecig nugtal ee gau mai zabun salau gusig manem. Dudu agen ig eg migabun Uwait aurina, iguan koli Uwait ag ebalagab igul naliu mabun auranem. Dudu agen ig eg migena, iguan koli i eg maraimai, ig uhu go gamai aidanem. ¹³Dudu agen igual wanimig ebu polu ze mina, iguanag koli ze naliu awaranem. Getal alalai ulis, ig duailen agal ameagab ebu ee esues eg hamanemen sul usalai darem.

¹⁴Iz agal aipag nuabun sikut wai marab tam. Ag izal gelear iz ag alarem, gonun, ag Uwait nugau Ze suban sesamorabun aimai sikut wai marem. ¹⁵Gumaremen dudu tausen houhou sag (10,000), agen ag Kristus nugau igul sesamorabun abai marabun iboin, bo, agal memeagar asi i darem. Iz tutak ag Yesus Kristus nugau Ze Naliupet marena, ag agal oiagab petak emen, gonun, iz sag iz agal memeag. ¹⁶Gonun, o zaiar, ag izal igul sesamorabun aimai gusig ze awarem. ¹⁷Iz ag waiagab Timoti palautem. Go izal nagwai sul, iz go en oiab nug noumaneu, go Dubanou Ban nugau ze suban sesamoraneu. Iz Kristus dual pezai daimai, ein igul manem en go nug agal dabeleu koli asai maramau. Iz igul go Kristen duaillel uzan unum ebu abai marai darem. Timoti nug ag betei awaramau.

¹⁸Bo, ag ula, dudu ipal agal dabeleu iz ag waiagab i alai aimai, agal wanimag wag maimai, Uwait nugau Ze suban i sesamoranemen. ¹⁹Bo, Dubanou Ban nug, iz koli ag waiagab bitabun ailaba, ban dai i, ag piarabun bitai. Gonun, iz beteimai, dudu go agal ze tutak i duai. Iz dudu go agal gusig erunai pet piaranai. ²⁰Iz go guzenai, einen, Uwait nug duaillel gumaraneu igul go abe mabun, ig ze sag i dumam, ig agal salau gusig mui daremen ta ag piaramam. ²¹Agal dabeleu erunai pet, iz ag esalau sul oiarabun bu oi bitai ta, iz ag en oiab noumaimai, oiab siksikaimai piarabun bitai ta?

5 ¹Ag ula du tub go wal igul eg pet meun ailina, domin. Wal igul eg pet go Umus ougan duaillel i guzenanemen, igul go egonou pet. Igul go enai, du go nug gonugau memeg nugau air wab imai aidaneu ailina, domin. ²Ag igul eg go en abe maimai, ag siksikanemen. Igul go naliu ta? Tam! Ag gonugau igul eg go en oiagab eg waimai, go du go igul eg go meun go ag abai i gotulai damau, zamoran. ³Ag abiu iz ag abai betei dab tam, iz pulig darem, bo, izal wes ag abai betei dareu, go iz ag abai betei darem sul. Gonun, iz du gonugau igul sisioroimai, go igul eg meun pemin. ⁴Agal gotulanemen ziwass ebu, ag igual Dubanou Ban, Yesus nugau wanib ulagwag mina, izal wes ag abai ereg dacaneu. Iguale Dubanou Ban, Yesus nugau gusig nug ig ula alai dacaneu. ⁵Gonun, go wal igul eg macaneu du em e ebu anenib eg murabun Satan nugau egeg ebu macan. Guzenebi, ai ses igual Dubanou Ban Yesus koli alamau ziwass ebu, du go nugau dorog imamau.

⁶Ag igul eg go en siksikaimai, wanimag wag macanemen. Igul go naliu tam! Ag i abiu ta? E tub *bret* aganem wanib zis, ginampet oimai, *bret* ebu mina, *bret* unum nilaneu. ⁷Zis go du gonugau igul eg sul. Ag muzin zis oi amahan. Guzenebi, ag unum Uwait nugau ameg ebu duaillel awau usalamamen. Petak, iz abiu ag duaillel igul naliu mui, einen, Kristus igual Pasowa* nugau sipsip nag sul dudu ipal agen wina, noumaimai, igual igul eg zilagai migeun. ⁸Guzenaimai, ig igual zobu piabun ebu igual igul eg unum utab. Ig ag duaillel ipal eg marabun i dabilab, ig ag Satan nugau

igul i sesamorab. Tam, ig ag igul eg unum uteimai, petak ze mui igul naliu mui tutak sesamorab. Igul go *bret* zis tamacag mui sul.

⁹Iz getal ag sikut wai maraimai, wal igul eg macanemen dudu abai i pezan aimai awaremin. ¹⁰Iz ag em e ebuan duaillel ag Kristen tam, agen wal igul macanemen, dudu ipal agal esab en oiagab nug alanemen, ecesab zob wanemen, mui polu uwait wanib wag macanemen duaillel abai i pezaran aimai awarab tam. Bo, ag uzaneim an duaillel go utaraimai, ag utei eru ebu unamamen? Ag guzenamamen ag em e unum utei unamamen. Iz ag dudu go utarabun awarab tam. ¹¹Iz ag du tub go nug Kristus en ougab petak eun, gonug koli wal igul eg macaneu, dudu ipal agal esab maraneu en nug oiagab alaraneu, polu uwait wanib wag maraneu, dudu ipal agal wanimag polu ze maraneu, wain ze asi zaneu, ecesab zob uacaneu, iz go du guzeneneg en ag go dual i pezan aimai awaremin. Ag du guzeneneg dual ee i zan.

¹²⁻¹³Iz ipal uzaneim an dudu sisiarabun, go izal salau tam, Uwait nugtal petak ag sisiamau. Ag agtal agal Kristen zaiagar sisiaran. Uwait nugau ze nug guzenai aneu, “Igul eg macaneu du ag abai daba, ag go zamorebi, ag waiagab dareu utebi, unamau.” *Lo 17:7*

6 ¹Ag ula, du tub gonugau zaug dual ze alalaba, agen go Uwait nugau igul i sesamoranemen dudu agal ameagab ebu gonugau igul sisiai murabun imai bitanemen ta? Go Uwait nugau Ze naliu sesamoranemen dudu waiagab imai bitabun iboin. ²Aiu ses Kristen duaillel agen em e ebuan duaillel unum agal igul sisiamam, ag i abiu ta? Gonun, em e ebuan igul ginampet ag waiagab dareu agen sisiarabun iboin. ³Ig aiu ses Uwait nugau tibur han agal igul sisiamam, ag i abiu ta? Go petak aba, ag em e ebu agal Kristen zaiagar agal igul eg macanemen sisiarabun iboin. ⁴Gonun, ag uhu mui, agal uhu pemen sisiai marabun du tub ag ula, go Kristen duaillel agal ameagab ebu wanib wag tamacag, go nug agal uhu sisiai marabun tapai mamamen ta? Tam, pet tam. ⁵Iz ze e ag aipag nuabun en sikut e wai marem. Izal dabeleu guzenai, ag ula du tub go dabeleu naliu mui go nug oiagab petak emen duaillel agal igul sisiarabun du go dareu. ⁶Bo, ag igul go i sesamoranemen. Ag ula du tub gonugau zaug Uwait nugau Ze i sesamoraneu du gonugau ameg ebu uzaneim an du waugab gonugau igul sisiai murabun imai bitaneu. Igul go egonou.

⁷Ag agal zaiagar uzaneim an ze sisiaranemen dudu waiagab imarai bitanemen. Igul gonug, ag Kristus nugau igul i sesamoranemen. Gonun, iz ag ze go awarem, ag agal Kristen zaiagar utarebi, goagen ag eg maramam, go iboi. Zaiagar agen agal ecesab zob wanemen, go han iboi. Bo, ag uzaneim an ze sisiaranemen dudu waiagab imarai bitamamen, igul go naliu tam. ⁸Bo, ag igul naliu i guzenanemen. Ag agtal agal zaiagar polumaranemen. Agtal dudu ipal agal ecesab zob wanemen. Petak, ag agal zaiagar ebalagab igul eg go macanemen.

⁹⁻¹⁰Iz petak pet awarem, igul eg macanemen dudu ag Uwait gumarabun alamau ziwas ebu, ag gonugau gumarabun empip i simamen. Ag go i abiu ta? Ag agtal agal oiagab i polumaneu. Duaillel inen ag wal igul macanemen, ag polu uwait wanib wag macanemen, ag dudu ipal agal aillel abai aidanemen, dudu ag dudu ipal abai wal igul macanemen, ag duaillel ipal agal ecesab oiagab nug alaraimai, zob wanemen, wain ze asiu zanemen, ag dudu ipal agal enimag ebu polu ze macanemen, ag duaillel ipal polumaraimai, goagal ecesab wanemen, duaillel go guzenanemen, ag Uwait nugau gumarabun empip i simai umamen. ¹¹Ag getal duaillel go guzenanemen sul dacanemen, bo, ulis Uwait nug agal igul eg zilagai marena, ag gonugau duaillel pet usalemen. Ag igual Dubanou Ban, Yesus Kristus mui, igual Uwait nugau Ah Wes mui, pezai daimai, Uwait nugau ameg ebu ag duaillel naliu usalemen.

Wal igul.

¹²Du tub nug guzenai aneu, “Iz ein igul mabun iboin. Du tub nug iz kuatai ze ailabun iborain tam.” Go iboi, bo, igul go nug unum ag isanarabun iboin tam. Petak, iz ein igul mabun iboin. Bo, iz ece tub nugau salau du i dai. ¹³Du tub nug guzenai aneu, “Ee go biguig oug nuabun, biguig go ee mabun zo.” Bo, aiu ses Uwait nug go aliag unum eg maramau. Igual enimig wal igul mabun tam. Igual enimig go Dubanou Ban ulagwag murabun. Dubanou Ban nug igual enimig gumaneu. ¹⁴Uwait nug gonugau gusig sil igual Dubanou Ban noumeun ebuan koli awau asai moroun. Guzenaital, gonugau gusig sil ig han koli awau dabun asai migamau.

¹⁵Agal enimag, Kristus nugau enib dual pezai dareu, ag i abiu ta? Iz Kristus nugau enib oimai, abu ebuan air nugau enib ebu pezai mabun iboin ta? Tam pet tam. ¹⁶Du in go gonugau enib oi beteimai, abu ebuan air nugau enib ebu pezai mamau, go agal enimag tutak tulanemen, ag go i abiu ta? Uwait nugau ze nug guzenai aneu, “Du air dual ag tutak sul usalamamen.” *Stat 2:24*

¹⁷Bo, du in go Dubanou Ban dual betei pezamau, gonugau wes Dubanou Ban nugau Wes mui pezai dacanau.

¹⁸Gonun, iz ag gusig awarem. Ag wal igul ebuan uminai alian. Igul eg ipal dudu agen macanemen go enimag ougan tam. Bo, du in go wal igul macaneu, go igul egonou pet, gonugau enib eg wai macaneu. ¹⁹⁻²⁰Agal enimag go Ah Wes nugau Nou Zau banou, ag go i abiu ta? Uwait nug gonugau Ah Wes ag mareun, go Ah Wes agal oiagab oug dareu. Yesus nug gonugau eseu sil ag gau mareun, gonun, agal enimag go agal sag tam. Gonun, agal enimag nug Uwait nugau wanib tutak ulagwag moron.

Du air egarabun igul.

7 ¹Ag getal iz du air egarabun igul en sikut wai milemen. Go izal dabeleu guzenai, du tub go air uab tam, go naliu. ²Bo, wal igul asiu

dareu, gonun, izal dabeleu guzenai, dudu ag air tutak sag umamen. Ailel han ag du tutak sag umamen, einen, ag igul go i guzenebi, Satan nug ag wal igul eg mabun keuaramau. ³Du nugau enib go gonugau wau nugau, du nug i galinamau. Air han gonugau enib go gonugau gamu nugau, air nug i galinamau. ⁴Einen, air getal du uab tam ebu gonugau enib nugtal gumaneu. Bo, ulis du oun, gonugau gamu nug gumamau. Du nugau enib han air nug gumamau. ⁵Na nait air dual dabun nait enim i galinen. Bo, ag oiagab tutak maimai, Uwait aurabun agal enimag galinamamen, go iboi, bo, ag ziwos hogu sag galinai damamen. Agal enimag gusig tamacag, gonun, ziwos hogu gue uteimai, ag koli tulamamen. Guzenebi, Satan nug ag wal igul eg ebu keuarabun iborain tam. ⁶Iz ag du ta, air ta, egarabun kasai ze gusig mab tam. Agal dabeleu eim, air wamoroi, on, go iboi. ⁷Izal dabeleu guzenai, duailen iza air tamacag darem sul damamen go naliu. Bo, Uwait nug duailen gusig beu beu maraneu, ipal air uabun gusig maraneu, ipal gaul dabun gusig maraneu.

⁸Iz ulis ag dudu air uab tam mui, ailel du uab tam mui, ailel gamulagar noumemen mui, ag awarem. Ag iza darem sul damamen go naliu. ⁹Bo, ag agal enimag suban gumabun iboin tam aba ag du ta, air ta, egarabun en aimai awarem. Ag air umamen, go iboi, bo, agal oiagab wal igul eg mabun asamau, igul go iboi tam.

¹⁰Du go air egaremen, iz kasai ze awaramoroi. Kasai ze go izal tam, go Dubanou Ban nugau. Go guzenai, air gonugau gamu i utamau. ¹¹Bo, air go nug gonugau gamu uteimai, go du tub i umau, gaul damau, tam aba, koli gonugau du uabun bitamau. Du go nug han gonugau air i utaba, unamau.

¹²Iz duailen ipal awaramoroi. Go Uwait Banou nugau dabeleu tam. Izal dabeleu go guzenai, du tub go Yesus en ougab petak eun, go air tub gonugau ougab Yesus en petak ab tam oimai, air go nug du go dual dabun amau, du go nug air go i utaba, unamau. ¹³Guzenaital, air tub gonugau ougab petak eun, go du tub gonugau ougab petak ab tam oimai, du go nug air go dual dabun amau, air go du go i utei unamau. ¹⁴Du go gonugau ougab petak ab tam, gonugau air ougab petak eun dual pezai damau, du go gue Uwait nugau ameg ebu naliu damau. Air tub gonugau ougab petak ab tam, gonugau du ougab petak eun dual pezai damau, go han Uwait nugau ameg ebu naliu damau. Igul go i guzenebi, agal geleagar aleagar han emgasag ipal ebuan duailen ag Uwait nugau igul naliu i sesamoranemen dudu agal geleagar aleagar sul damamen. Bo, go petak tam, agal geleagar aleagar Uwait nugau ameg ebu naliu dacanemen.

¹⁵Bo, du go gonugau ougab petak ab tam, go nug air go gonugau ougab petak eun utamoroi amau, go iboi, unamau. Uwait nug go en gusig ze anab tam, gonun, go enai igul zuba, du go ta, air ta, gonugau ougab

petak eun, go gonugau gamu ta, gonugau wau ta gusig i patamau. Einen, Uwait nug ag duail el ipal oiagab selai mui dabun tapai mareun. ¹⁶Bo, na, ounab petak emen air, na i abiu, nait gamut ougab petak ab tam go na igul naliu sesamoreben, peizaimai, gonugau ougab koli kekulabun iboin ta, tam ta. Na, ounab petak emen du, na han i abiu, nait wat ougab petak ab tam, nait igul naliu sesamoreben, peizaimai, gonugau ougab kekulabun iboin ta, tam. Agen guzenebi, Uwait nug ag koli imaramau.

Ig ein igul guzenemun, Uwait nug uligeun, ig igul go ebutal damam.

¹⁷Bo, ag tutak tutak erunai pet daremen ebuan Uwait nug ag Yesus Kristus sesamorabun ulareun ag go ebutal guzent al dan. Dubanou Ban nug ag guzent al dabun tapai mareun. Iz kasai ze go Kristen duail el ag uzan beu beu gotulanemen ebu unum awaranem. ¹⁸Du in, gonugau enib galau kuateun ebu, Uwait nug uleun go enib galau go koli kasabun i dabilamau. Du in gonugau enib galau kuatab tam ebu, Uwait nug uleun, gonugau enib galau kuatabun i dabilamau. ¹⁹Du gonugau enib galau kuateun ta, gonugau enib galau kuatab tam ta, igul go banou tam. Du in go Uwait nugau kasai ze sesamoraneu, igul go banou.

²⁰Dudu tutak tutak ein salau ebu darena, Uwait nug ulareun, go salau go ebutal damau. ²¹Na salau du (slev*) daremen ebu, Uwait nug ulizeun, na ounab eg i umau, bo, salau utabun abu daba, utamam. ²²Du in go salau du (slev) dareun ebu, Uwait Banou nug uleun, ulis go Banou nugau. Uwait Banou nugau ameg ebu go koli salau du (slev) i damau. Guzenait al, du in go nugtal gonugau salau mai dareun ebu, Uwait nug uloroun, ulis go Kristus nugau salau du (slev) damau. ²³Yesus Kristus nug ece banou sil ag gau mareun, gonun, ag dudu ipal agal salau dudu (slev) i damamen. ²⁴O zaiar, ig ein igul ebu darena, Uwait nug uligeun, ig igul go ebutal dab. Ig unum Uwait nugau pigsal darem.

Pol nug dudu ailel egarab tam goagal ze mareun.

²⁵Ze tub han dudu ailel egarab tam en ailemen. Go en Uwait Banou nug iz kasai ze milab tam, bo, izal dabeleu eiman awaramoroi, einen, Banou nug iz en ougab eg wai maimai, iz gonugau ze marabun tapai mileun, gonun, iz ag petak ze awarabun iboin.

²⁶Ulis ig ebilangab uhu banou zuaneu pianem, einen, ig Yesus sesamoraneu. Izal dabeleu guzenai, du air uab tam, go guzent al damau. ²⁷Na du air mui, na nait wat utabun abu i itanamam. Na du air i omen, na air uabun abu i itanamam. ²⁸Bo, na air umam, igul go eg tam. Air du i omen, go du umau, go han igul eg mab tam. Bo, duail el egaremen ag em e ebuan uhu banou umamen. Iz uhu go ag ebalagab zuabun utem, gonun, go en awarem.

²⁹O, zaiar, iz einen guzenai awarem? Ulis ziw as hogu usaleu, em tamabun ziw as waugab zoi dareu. Du air mui ag air i omen sul dan.

³⁰Duail el uhu mui ag manil mai dacanemen, ag manil i mai dacanemen sul soai dan. Duail el ag siksikai damamen, ag siksikab tam sul dan. Duail el ag ecesab gau macanemen, ag ecesab go gau macanemen agal pet aimai i dabilan. ³¹Duail el ag em e ebuan ecesab en salau macanemen, ag salau go banou aimai anabun iboin tam. Einen, ig abiu, em e mui ecesab unum e ebu darem unum tamarai beteu.

³²Izal dabeleu guzenai; ag em e ebuan ecesab naliu en dabeleu asiu i on aimai awarem. Air i omen du go Dubanou Ban nugau salau oi murabun tutak dabilaneu, gonun, go Uwait Banou nugau ougab siksikabun dabileimai, salau naliu mabun guzenaneu. ³³Bo, du air a, go em e ebuan ecesab en dabilaneu, einen, go gonugau wau nugau ougab siksikabun dabilaneu. ³⁴Gonun, gonugau dabeleu aliag dareu. Air go du i omen ta, air magun ta, ag Uwait en dabeleu asiu maimai, agal enimag mui, doropag mui, unum Uwait Banou murabun guzenanemen. Bo, air du a, go em e ebuan ecesab en dabilaneu, einen, go gonugau gamu nugau ougab naliu usalabun aimai guzenaneu. ³⁵Iz ze e ag isanarabun awarem. Iz ag ebalagab kasai ze uhu mui marabun utem. Ag naliu daimai, Dubanou Ban nugau salau moroimai, ecesab tub nug keuaraba, agal dabeleu ata atai i uabun aimai awarem.

³⁶Bo, du in air tub uabun tapai moromen, dai dai, aiu ses air go ebu igul naliu mab tam dabileimai, gonugau ougab air go uabun asaba, umau. Go igul go guzenamau, go igul eg i mamau. ³⁷Bo, du in gonugau ougab gusig maimai, gonugau enib suban gumabun iboin, go air uabun tapai moromen i wai aimai dabileimai, i umau. Du go han igul naliu meu. Go igul eg mab tam. ³⁸Gonun, izal dabeleu, du go air umau, go igul naliu meu, du go air i umau, go igul naliu pet meu.

³⁹Kasai ze guzenai en iz anem, 'Air go du a, gonugau gamu mui pezai dacaneu, utabun iboin tam.' Bo, gonugau gamu noumai utei unaba, air go betei du tub awau uabun iboi, bo, go du Dubanou Ban en ougab petak eun du umau. ⁴⁰Bo, go koli du i wai amau go siksikai damau. Izal dabeleu guzenai, Uwait nugau Ah Wes iz ibail dareu, gonun, iz ze go anem.

Pol nug egun dudu ipal agen polu uwait maranemen en aneun.

8 ¹Ulis egun dudu ipal agen polu uwait muranemen, agen oimai, zanemen en awaramoroi. Agen ig ece go unum abiu memun aimai ananemen. Go petak, bo, abe memenin gonug agal wanimag wag macanemen. Bo, igual oigeb nug zaiger en noumina, igul gonug ig Kristen duail el naliu isanigamau. ²Du tub nug, iz ece unum abiu amau, du go gonugau dabeleu naliu tam, einen, go petak ece unum i abiu. ³Bo, du in gonugau ougab Uwait en noumaneu, Uwait nug du go abiu muraneu.

⁴Gonun, iz ag egun go dudu ipal agen polu uwait morona, agen oimai, zanemen en awaramoroi. Ag don, ig abiu polu uwait agal wes go petak

tam, go gaul wes nugau dorog. Iguar Uwait petak dareu. ⁵Dudu ipal agal dabeleu guzenai, wes ipal Mesgai wag mui em e ebu mui darem anem. Go petak, polu uwait asiu mui, ece asiu Umus ougan duailen ag agal Banou anemen mui darem. ⁶Bo, iguar Uwait tutak dareu, go iguar memenig, go nug ece unum em e ebu mui Mesgai wag mui usalai meun. Iguar salau go gonugau wanib wag murabun. Iguar Dubanou Ban tutak go Yesus Kristus. Gonugtal e ece unum usalai meun. Gonugau gusig ebu sag ig darem.

⁷Bo, Kristen duailen oiagab petak emen gusig tam asiu ag ze go i abiu. Duailen guzenai ag getal umkoskos polu uwait go agal wanimag wag macanemen. Gonun, ag egun dudu agen polu uwait agal wanimag wag murabun agemen agal dabeleu ag egun go polu uwait petak ulagzanemen aimai ze macanemen. Guzenina, agal dabeleu gusig tam, gonun, ag egun go zaimai, agal dabeleu ag Uwait nugau ameg ebu unu mui aimai dabilanemen. ⁸Ee ipal zab go nug Uwait waugab i imaigei simau. Bo, ig ee zimam ta, ig ee i zimam han, Uwait nugau ameg ebu ata atai i damam.

⁹Bo, ag suban pian! Ag abiu ag egun go zabun oiagab nug noumaimai, zanemen, go iboi. Bo, ag igul go Kristen duailen ag oiagab petak emen gusig tam agal ameagab ebu guzenanemen, ag agal abu ebu titouai alai nuabun us macanemen sul macanemen. ¹⁰Einen, du tub, gonugau ougab petak eun gusig tam, go na dabeleu naliu mui, polu uwait nugau Nou Zauem tub simai, na egun go zemen, peizaimai, go han egun go zabun iboin aimai zimau. ¹¹Gonun, nait dabeleu naliu nug nait zaun gonugau ougab petak eun gusig tam eg morom. Kristus nug du go en han noumeun. ¹²Ag agal zaiagar igul eg go maraimai, agal oiagab petak emen eg maramamen ag Kristus go han igul eg muranemen. ¹³Gonun, iz ee zanem nug izal zai igul eg muramau aimai, iz awau daimai, koli egun tub i zai. Iz igul go guzenai, iz izal zai ebu igul eg i mai.

Pol nug Yesus nugau ze oi aidabun du nugau salau en aneun.

9 ¹Iz Yesus nugau ze oi aidanem du. Iz dudu ipal agal salau du tam, iz ein salau mabun ece tub nug i tapelamau. Iz izanag izal ame nug iguar Dubanou Ban, Yesus pemin. Izan Dubanou Ban nugau salau mina, salau gonug ag duailen agal oiagab kekulemen. ²Duailen ipal agen iz Yesus nugau ze oi aidanem du tam aimai, ailanemen, bo, ag Kristen duailen, ag iz abe milemen, einen, ag Dubanou Ban dual pezai daremen, gonun, go en ag iz gonugau ze oi aidanem du darem aimai araog abai maranemen.

³Dudu ipal agen izal bimai piabun kanabina, ze go eim izal eiman isanilabun awarai. ⁴Ig Uwait nugau Ze oi aidabun dudu ig iguar salau go eiman ee ze mui ag ebuan oimai, zabun iboin ta? ⁵Ze oi aidanemen dudu ipal mui, Dubanou Ban nugau amagul mui, Pita mui, ag agal ailel

oiagab petak emen ag abai ereg abu ebu gumarabun imaremenin. Ig alabun igual waliger abai alemun, agen gumigabun iboin tam ta? ⁶Ta, iz Barnabas dual iguatal Uwait nugau salau mai daremun, salau ipal maimai, aiwag oimai, ee gau mai zimam ta?

⁷Malai du tub, go nugtal salau tub atai maimai, gonugau salau mabun nugtal gonugau aiwag uabun iboin ta? Tam, go i guzenaneu. Go malai ebuan tutak gonugau aiwag uacaneu. Du tub go ougem ee ug baimai, useg naliu mizanina, go ee go i zaneu ta? Tam, go zaneu. Du tub go egun gumanau, go egun gonugau tabug i zaneu ta? Tam, go zaneu. ⁸Iz ze e awarem dudu go agal dabeleu eiman awarab tam, einen, ze e awarem go Uwait nugau kasai ze nug guzentel aneun. ⁹Moses nugau kasai ze ebu, go guzenai sikut weun, “Bulumakau nug wit dab tapa tapaba, gonugau ogusau i kiai macan. Wit dab ipal utebi, zimau.” *Lo 25:4* Uwait nug bulumakau en petak aneun ta? ¹⁰Tam, go igua en aneun. Petak pet, ig isanigabun sikut wai meun. Go ze go aneun, einen, ee ug babun du mui, ee uabun du mui, ag salau maimai, ougem go ebuan ee uabun gumei dacanemen. ¹¹Iguanag agal doropag isanarabun Uwait nugau Ze maremun, gonun, ig em e ebuan ecesab ag ebalagab uabun iboin ta? ¹²Dudu ipal ag isanarebi, agen ag ecesab isanarabun maranemen. Guzenebi, ig ag suban isanaranem, gonun, ag ig agal ecesab asiu migabun iboin.

Bo, ig ag abai daimai, ag ig ecesab go migabun aimai awarab tam. Petak, ig uhu asiu gamacemun, go einen, ig Kristus nugau Ze Naliupet abu tapelai i damau. ¹³Ag abiu du in go Uwait ecesab muranemen zau banou zaueim salau macaneu du, go Nou Zau banou go zauan ee zaneu. Dudu go ag Uwait ulagwag murabun biz ebu egun aganem, ag biz go ebuan egun zanemen, go ag abiu. ¹⁴Gonun, Dubanou Ban nug go en gusig ze meun, dudu inen ag Uwait nugau Ze Naliupet duailen awaranemen, duailen ipal ze go doimai, agen koli ecesab ipal dudu go isanarabun maranemen.

¹⁵Bo, iz ag ecesab tub milabun aimai i awaranemin. Iz ulis sikut wai maraimai, ag ecesab go iz aiu ses milabun aimai i awarem. Tam pet tam. Izal dabeleu du tub nug ag ebalagab ecesab omin aimai ze meu, go ze eg. Izal dabeleu iz noumanai, go naliu. Iz gaul salau manem, gonun, izal oiab siksikeu. ¹⁶Iz izal wanim wag mabun en Uwait nugau Ze Naliupet duailen marab tam, einen, Uwait nug iz salau go mabun gusig ze aileun. O iza en bisou pem, iz Uwait nugau Ze Naliupet go duailen i maremin, Uwait nug ig sisicigabun ziwas ebu, iz uhu banou milamau. ¹⁷Iz salau go izal dabeleu eiman guzenemin aimai, iz koli ecesab naliu tub wai, bo, iz salau go izal dabeleu eiman mab tam, salau go Dubanou Ban nugtal izal ebeab meun. ¹⁸Gonun, iz salau go ebuan ein ecesab naliu wai? Izal dabeleu ecesab naliu go guzenai, iz Uwait gonugau Ze Naliupet marai darem, iz

go ebuan ecesab i wai, go oiab siksikai damau. Iz Ze Naliupet go duailen gaul marai darem, iz salau go ebuan aiwag i wai, go oiab naliu siksikai damau.

Pol go duailen agal salau du sul dareun.

¹⁹Iz dudu ipal agal salau du tam, bo, iz izanag izal dabeleu eiman duailen unum agal salau du darem, einen, igul go eiman duailen asi Kristus waugab imarai alabun aimai, guzenem. ²⁰Iz Zuda duailen abai daremin ziwas ebu, iz agal ameagab ebu Zuda du sul danem, einen, ag Kristus waugab imarai alabun ag danemen sul danem. Iz izanag agal kasai ze pigsal dab tam, bo, iz ag abai daimai, iz du tub kasai ze go pigsal daneu sul danem. Igul go ebu, iz dudu kasai ze pigsal danemen imarai alabun iboin. ²¹Iz emgasag ipal ebuan duailen ag kasai ze i abiu ula ebu daimai, iz du tub i abiu sul danem. Dudu go ag kasai ze i abiu Kristus waugab imarai alabun guzenanem. (Ziwas go ebu, iz Uwait nugau kasai ze utab tam, bo, iz Kristus nugau kasai ze sesamoraimai, guzenanem.) ²²Iz dudu ipal ag Yesus en agal oiagab gusig i macanemen, ula ebu daimai, iz ag sul gusig tamacag usalai danem. Iz dudu go agal oiagab gusig tamacag imarai alabun aimai guzenanem. Iz dudu agal igul erunanem, sesamoraimai, ipal Kristus waugab imarai alabun guzenanem. ²³Iz salau go Yesus nugau Ze Naliupet gusig mabun en manem. Iz ecesab naliu go Uwait nugau Ze Naliu nug migabun aneun wabun salau mai darem.

Ag salau gusig maimai, ece naliu umamen.

²⁴Ag abiu, dudu gurgurabun ziwas ebu dudu unum gurguranem. Bo, du tutak nug amegai begeh mazicaneu, go esab waneu. Gonun, ag ece naliu wabun gusig gurguran. ²⁵Duailen inen ag gurguraimai, ece wabun ag agal enimag salau gusig muranemen. Ece go wabun tutak dabilanemen. Ag esab naliu wabun gurguranemen, bo, esab go em e ebuan esab, gonun, eg usalamau. Bo, ece go ig wabun salau gusig mai darem, go i eg usalamau, muzmuz damau. ²⁶Gonun, iz dudu gusig gurguranemen sul guzenanem. Ag abu tugui ai tutak eiman gurguranemen sul, iz i keku kekulanem. Iz dudu ebeag sil alalanemen gonugau egeh ata atai i amaceu sul guzenanem. ²⁷Iz izal enim tabug salau gusig muranem. Guzenemin, izal enim tabug go izal salau du sul usalaneu. Iz guzenanem, einen, iz duailen ipal Uwait nugau Ze awarai poaimai, ipei, igual Uwait nug iz semileimai, go nug iz gonugau ece naliu i milamau.

Pol nug Zuda agal embigeg en ze meun.

10 ¹O zaiar, e izal dabeleu guzenai: getal igual embigeg ag Moses sesamorai alemen ziwas ebu erunemen koli dabilan. Getal

igual embigeg Uwait nug pi oug ag kularai maraimai, gumarina, ibut ze matelai, alemen. ²Igul gonug, ag go pi oug mui, ibut ze nug mui ag ze ziwemenin sul. Go ag Moses sesamoranemen dudu usalabun abai mareun. ³Ag unum ee go Uwait nugau Ah Wes nug marena, zemenin. ⁴Ag unum han ze go Uwait nugau Ah Wes nug marena, zemenin. Ze go aiwag ougeiman nuna, zemenin. Aiwag gonugtal ag sesamarai beteun. Aiwag go Kristus nug sag. ⁵Igul go guzeneun, bo, igual embigeg ula, asiu ag Uwait nugau igul i sesamoranem, gonun, Uwait nug ag en aigsisilaimai, wagarina, du tamacag uzan em ula ebu noumizanemen.

⁶Igul go unum zoun, ig ulis goagal igul eg i sesamorabun aimai abai migeu. Ag agal oiagab igul eg mabun gusig memen, ig ag guzenemenin sul i guzenab. ⁷Ipal agen polu uwait agal doropag ebeag sil usalai maimai, ulagzanemen sul, ig i guzenab. Getal Uwait nugau ze nug guzenai aneun, “Duailel ag hoboimai, ee ze mui zaimai, koli Umus ougan duailel sul polu uwait nugau dorog ameagab ilanabun wanemenin.”

Kisim Bek 32:6

⁸Ig ipal agen wal igul macanemenin sul i guzenab. Go wal igul eg mina, ziwas tutak ebutal 23,000 duailel noumemenin. ⁹Ig han Uwait Banou bimag i piab. Igual embigeg ipal agen Uwait Banou bimag pei darena, man agen kaluarena, noumemenin. ¹⁰Igag i gonogonocab. Igual embigeg ipal agen gonogonocina, Uwait nugau tibur nug duailel wagarina, noumanemen go nug alaimai, duailel go wagarina, noumemenin.

¹¹Igul go unum ag ebalagab zoun, go ig ag dorog piabun. Go ig igul eg i sesamorabun aimai, sikut wai memen. Einen, ig ulis em ebu darem, em go poabun ziwas waugab dareu. ¹²Gonun, du in go iz gusig tapai darem aimai dabeleu, go subantal damau. Tam aba, go igul eg ebu alai numau. ¹³Ag don, ein igul nug ag bimaiaig piabun keuaraimai, ag ebalagab zuaneu, igul go atai tam. Go duailel ipal ebalagab guzantal zuaneu. Bo, Uwait nug umkoskos ag suban gumaraneu. Go abiu agal gusig erunai pet dareu, gonun, go igul tub ulagzaba, go nug agal gusig zilarabun i usalamau. Bo, bimaiaig piabun ziwas alaba, go nug abu tub usalai maraba, ag gusig tapai dabun iboin.

Polu uwait agal ee mui Uwait nugau ee mui.

¹⁴O zaiar, iz ag en alarem. Ag polu uwait ulagzanemen igul ebuan utei uminai alian. ¹⁵Iz ag dabeleu naliu mui duailel awarem, agtal izal ze suban sisian. ¹⁶Go gap ig Dubanou Ban nugau ee zabun ziwas ebu oimai, Uwait ‘Ese-e’ auraimai, wain ze zanem, go ig Kristus nugau eseu mui gotuliganeu. *bret* go Dubanou Ban nugau ee zabun ziwas ebu, kikakaraimai, zanem, go ig Kristus nugau enib mui gotuliganeu. ¹⁷Einen, *bret* tutak dareu, ig asiu darem, bo, *bret* go tutak ig unum zanem, guzenaimai, ig duailel enimig tutak sul gotulanem.

¹⁸Ag Israel duailen en dabilaran. Ag Uwait ulagwag moroimai, biz ebu egun agena, zanemen. Gonug ag Uwait dual ereg gotulanemen. ¹⁹Iz ze e awarem go iz polu wes Umus ougan duailen agen wanimag wag marabun biz ebu egun aganem go petak aimai anab tam. Iz polu wes go dorog han petak aimai awarab tam. ²⁰Tam pet tam, go Umus ougan dudu agen agal polu wes murabun egun agaimai, wanimag wag maranemen, go ag Satan nugau wes eg ulagwag mai daremen. Ag Uwait i ulagzanemen. Kristen duailen, ag go Satan nugau wes eg abai i tulab aimai gusig awarem. ²¹Ag Dubanou Ban nugau gap ebu ze zaimai, koli betei Satan nugau wes eg nugau gap ebu ze zanemen, igul go naliu tam, ag i guzenan. Ag Dubanou Ban nugau biz ebuan ee zamai, koli betei, Satan nugau wes eg nugau biz ebuan ee zanemen, go naliu tam, ag i guzenan. ²²Ig Dubanou Ban aigsisilabun igul go guzenanem ta? Igual gusig nug gonugau gusig zilacorou ta?

Oiagab petak emen duailen ag duailen ipal agal piagsal dab tam.

²³Ig ein igul guzenabun du tub nug igual abu tapelabun iborain tam. Go petak, bo, igul unum nug ig isanigabun iborain tam. Ig igul unum guzenabun iboin, bo, ipal igul nug ig Kristen duailen gusig usalabun i isanigamau. ²⁴Ig igua sag isanigabun i dabelab, ig zaiger ipal isanarabun dabelab. ²⁵Ein egun ee ig wanem empip ebu dudu ipal agen aiwag uabun mina, agen gau maimai, zabun iboin. Ag oiagab aliag mui go en dabeleu asiu oimai, beteimai, e egun polu wes ebu agemen aimai i kanabai aidaneu. ²⁶Einen, ig unum abiu, em e mui, ece unum e ebu dareu mui, go Dubanou Ban nugau sag.

²⁷Du tub gonugau ougab Yesus en petak ab tam go nug gonugau zaueim ee zabun aizaba, beteiba, ein ee mizaba, zen. Ounab aliag maiba, i kanabai auren. ²⁸Bo, du tub nug aizamau, 'E ee polu wes ulagwag moromen ebuan' aizaba, na du go nugau ze aizeun doiba, gonugau ougab eg mabun ee go i zen. ²⁹Iz agen agal oiagab eg wabun igul go guzenanemen aimai, ze mab tam, ag ee go zanemen, ag igul eg i macanemen, bo, iz du go nugau ougab eg wamau en aimai guzenai ze mem.

Bo, du tub nug guzenai ze meu, "Du tub nug iz ein ee zabun kuatai ailabun iborain tam, ein ee zabun en go iz zabun sag. Iz einen du tub nugau ougab eg wabun en dabilai? ³⁰Iz ee zabun Uwait 'Ese-e' auremin du tub nug iz igul eg mem aimai ailabun iborain tam. Einen, amegai iz Uwait 'Ese-e' auraimai, zemin."

³¹Bo, iz gusig awarem, ag ein ee zanemen, ein ze zanemen, ein igul guzenanemen, go Uwait nugau wanib wag murabun guzenan. ³²Ag igul naliu macan. Guzenebi, Zuda duailen ta, Grik duailen ta, duailen agal oiagab petak emen ta, ag agal igul uligaimai, igul eg ebu i igarai numau.

³³Iza guzenanem sul guzenan. Iz izanag izal enim tabug isanorabun en i dabilanem, iz duailen unum isanarabun dabeleimai, ag Kristus waugab imarai alabun guzenanem.

11 ¹Iz Kristus nugau igul sesamoranem sul, ag iz peilaiban, izal igul sesamoran.

Pol nug gagaliag kulai macanemen en ze meun.

²O zaiar, izan igul unum abai maremin ag umkoskos dabeleimai, sesamoranemen. Ag guzenanemen, gonun, iz ag en oiab siksikina, agal wanimag wag maranem.

³Iz ag ze e awaramoroi, ag unum abe macan, dudu ag Kristus pigsal daremen, ailel ag dudu piagsal daremen, Kristus go Uwait pigsal dareu. ⁴Du in go duailen ameagab ebun gonugau gagaliag kulaimai, Uwait auranen ta, Uwait nugau Ze macanenu ta, du go gue gonugau Dubanou Ban Kristus nugau wanib tonoi muranenu. ⁵Bo, air in go duailen ameagab ebun gonugau gagaliag kulab tam, Uwait auranen ta, Uwait nugau Ze maranenu ta, air go gue gonugau gamu nugau wanib tonoi muranenu. Air in go gonugau gagaliag kulab tam, go air tub gonugau gagaliag gulum usalanenu sul. ⁶Gonun, air in gonugau gagaliag tibur galau sil kulabun utamau, gonugau gagaliag ulig hogu kuatamau. Air in go gonugau gagaliag ulig hogu kuatamau ta, gulum usalamau ta, go aui numau aimai, gonugau gagaliag tibur galau sil kulamau. ⁷Du go gonugau gagaliag tibur galau sil i kulai mamau, einen, go Uwait nugau dorog sul, go Uwait nugau wanib wag mui duailen abai maramau. Bo, air go gonugau du nugau wanib wag mui duailen abai maramau. ⁸Go einen, Uwait nug air nugau enib oimai, du patai mab tam. Tam pet tam. Go du nugau gasagpaiu oimai, air patai meun. ⁹Uwait nug du go air salau isanorabun patai mab tam, Uwait nug du en dabileimai, du salau isanorabun air patai meun. ¹⁰Igul gonun, ailel ag dudu piagsal daremen abai marabun agal gagaliag tibur galau sil kulan. Ag guzenebi, Uwait nugau tibur uligaraimai, ag ailel dudu piagsal daremen abe mamam.

¹¹Duailen ag Dubanou Ban dual pezai daremen, air go nugtal i dareu, du han guzentel go nugtal i dareu. Air nug du isanuranenu, du nug air isanuranenu. ¹²Go petak pet, Uwait nug du gonugau gasagpaiu oimai, air patai meun. Bo, ulis, du go air ougaban zuanenu. Bo, Uwait nugtal ece unum usalai meun. ¹³Agtal agal igul sisian. Air tub duailen ameagab ebun gonugau gagaliag tibur galau sil kulab tam Uwait auranenu, go agal ameagab ebun naliu ta? ¹⁴Uwait nug em eban duailen erunai pet patarai meun, ig abai miganeu, du gagaliag ulig huia mui, go aui nuabun iboin. ¹⁵Bo, air gagaliag ulig huia mui go gonugau iweiu naliu pet. Einen, Uwait nug gonugau gagaliag ulig huia gonugau gagaliag kulabun moroun. ¹⁶Du in nug ze go en ze alalanenu iz du go guzenai auren, ig igul tub i sesamoranem. Kristen duailen unum han ag igul tub i sesamoranemen.

Dubanou Ban nugau ee zabun ziwias.

¹⁷Ulis, iz ag gusig ze awaramoroi. Iz ag en oiab i siksikaneru. Iz ag en oiab eg waneu. Einen, agal gotulanemen ziwias ebu, ag igul naliu mab tam, ag igul eg macanemen. Ag agzozou i isa isanaranemen. ¹⁸Iz igul go en amegai awaramoroi, ag zobu piabun alai gotulaimai, ag beu beu atalanemen ze ailemen domin. Ze go ailemen en iz oiab petak eu. ¹⁹Izal dabeleu agzozou atalanemen, igul go nug ag ula du in gonugau ougab Uwait en petak aneu araog abai maraneu, go iboi.

²⁰Ag alai gotulaimai, agal dabeleu agen igua Dubanou Ban nugau ee zem aimai dabilanemen, bo, ag Dubanou Ban nugau ee zab tam. Tam pet, tam. ²¹Ag ee zabun ziwias ebu ag tutak tutak oiagab putputina, pigai agal ee oi zanemen. Ag duail el ipal zuabun i gumaranemen. Guzenina, dudu ipal ag ee tamacag we dacanem, dudu ipal ag wain ze asi zamai, dabuiag guganeu. ²²Ag agaltal zau oug ee ze mui zabun iboin tam ta? Agal dabeleu guzenai ta, Uwait nugau zau go gaul zau aimai zaueim zoimai, zaiagar ecesab tamacag ipal aipag nuabun aimai guzenanemen. Iz igul go guzenanemen en ein ai awarai? Iz igul go en agal wanimag wag i marai, tam pet tam! Agal igul egonou pet.

²³⁻²⁴Iz ze go abai maremin go Dubanou Ban nug mileun. Go guzenai, umaum go Zudas nug igual Dubanou Ban, Yesu gonugau iwai zaugul ebeagab ebu mabun ziwias ebu, Yesu nug *bret* oimai, Uwait ‘Ese-e’ auraimai, kikakaraimai, eneun, “E izal enim tabug, ag isanarabun marem. Ag *bret* e zaimai, iz en dabuiag ilen.” ²⁵*Bret* zai mazicaimai, gap wain ze mui oimai, eneun, “E gap go Uwait nugau baib awau izal esep sil pezai meun. Ziwias ipal e gap wain ze zaiban, iz en dabelen.” ²⁶Ag ein ziwias ebu, *bret* go mui gap wain go ze zaimai, duail el ipal Dubanou Ban noumeun ze awarai dabi dabi, koli Dubanou Ban nug alamau.

²⁷Gonun, duair in go igul eg Kristus nugau wanib tonoi murabun guzenaneu Dubanou Ban nugau *bret* mui gonugau wain ze gap ebu zaneu, duair go Dubanou Ban nugau enib tabug eseu mui eg muraneu. Go ze a, ai u ses go uhu umau. ²⁸Gonun, duail el tutak tutak amegai agal oiagab oug erunai pet dareu sisiaimai, Uwait nugau *bret* mui wain ze mui zan. ²⁹Duair in go amegai Dubanou Ban nugau enib tabug en dabilab tam, go gaul *bret*, wain ze zimau, go gue Uwait nugau ameg ebu ze a. ³⁰Igul go guzenina, ag ipal gusig tamacag dacanemen, ipal ebeu wanemen, ipal noumanem. ³¹Bo, ig igual oigeb suban sisiaimai, Uwait nugau ee zab, uhu go i wab. Ig guzenamam, Uwait nug ig sisicigeimai, ig ze a aimai i aigamau. ³²Bo, ziwias ipal ebu, ig Uwait Banou nug sisicigeimai, igul naliu abai migabun uhu miganeu. Gonun, ai u ses Uwait Banou nug sisiaibun ziwias ebu, em e ebu an duail el ze a aimai, go nug ig ag abai ereg ze a aimai i aigamau.

³³Gonun, o zaiar, bo, ag Uwait nugau ee zabun alai tulaimai, pigai ee i zab, zaiagar zuabun gumarai dan. ³⁴Du in go petak we waba, go koli gonugau zaueim betei ee zamau. Gonun, ag alai gotulebi, Uwait nug ag ze tamacag ai awaramau.

Ze ipal dareu, aiu ses izanag ag waiagab alaimai, ze go kasai.

Uwait nugau Ah Wes nug ig ag gusig naliu beu beu miganeu.

12 ¹O zaiar, iz ag Uwait nugau Ah Wes nug salau mabun gusig naliu ag tutak tutak maraneu en awaramoroi. Iz ag igul go suban abe mabun en awarem. ²O zaiar, ag abiu, getal ag Umus ougan duailel Uwait nugau Ze duab tam ebu, duailel ipal agen abu beu beu eiman keuarena, ag betei polu uwait agal doropag go ze i macanemen wanimag wag maranemen. ³Gonun, iz ag ze e suban abe mabun awarem. Du tub go Uwait nugau Ah Wes mui go nug enai ze mabun iborain tam, “Uwait na Yesus eg moren.” Du tub go Ah Wes tamacag mui gonug, enai ze mabun iborain tam, “Yesus go izal Dubanou Ban,” Du go gue Uwait nugau Ah Wes nugtal dabeleu go morona, go ougab petak aimai, “Yesus go izal Dubanou Ban” aneu.

⁴Ah Wes nug gusig naliu beu beu miganeu. Bo, go Uwait nugau Ah Wes tutak sag dareu. ⁵Uwait Dubanou Ban nugau salau murabun abu asiu dareu, bo, ig Dubanou Ban tutak sag ulagwag muranem. ⁶Uwait nugau salau murabun ig gusig beu beu mui, bo, Uwait tutak nug gonugau salau mabun gusig go beu beu unum miganeu.

⁷Uwait nugau Ah Wes gonugtal duailel tutak tutak gusig naliu agzozou isa isanarabun en maraneu. ⁸Uwait nugau Ah Wes nug du tub dabeleu naliu duailel ipal awarabun muraneu. Ah Wes go gotal du tub abiu mabun gusig morona, Uwait nugau Ze duailel abai marabun muraneu. ⁹Ah Wes go gotal du tub gonugau ougab petak abun gusig muraneu. Ah Wes gonugtal du tub duailel ebeu mui kasarabun gusig muraneu. ¹⁰Du tub gugeg beu beu mabun gusig muraneu. Du tub Uwait nugau Ze doimai, duailel awarabun gusig muraneu. Du tub ein ece Ah Wes eim aleun, ein ece go eiman alab tam, go sisiaimai, abiu mabun gusig muraneu. Du tub go uzan tuban ze beu beu marabun gusig muraneu. Du tub ze go ata atai en zebigeg erunai pet abiu maimai, kekulabun gusig muraneu. ¹¹Bo, gusig go beu beu Uwait nugau Ah Wes gonugtal gonugau dabeleu eiman alaneu. Gonug gonugau dabeleu eim duailel gusig beu beu maraneu.

Ig ag unum gotulaimai, enimig tutak sul dacanem.

¹²Du nugau enib tutak sag, bo, gonugau arab, ebeg, gagalig, unum gotulina, gonugau enib tutak usalaneu. Go guzenai, ig ag unum gotulina, Kristus nugau enib tutak sul usalanem. ¹³Gonun, ig ag unum Zuda

duailen ta, emgasag ipal ebuan duailen ta, salau duailen (slev) ta, duailen agal salau agtal gumaranemen ta, ig unum Uwait nugau Ah Wes tutak ebu ze ziwigemen. Uwait nug ig unum Ah Wes go tutak igual oigeb oug migeun. Gonun, ig ag Kristus nugau enib tutak sul darem.

¹⁴Ig ag unum abiu, igual enemig go tutak i dareu, go arab, ebeig, gagalig mui unum tutak tulai darem. ¹⁵Gonun, aram nug enamau, “Iz ebe tam, gonun, iz enib ebuan tam,” go guzenai ze maimai, i unamau, go ebutal pezai damau. ¹⁶Dabug gau nug enamau, “Iz ame tam, gonun, iz enib ebuan tam,” go guzenai ze maimai, i unamau, go ebutal pezai damau. ¹⁷Bo, enemig unum ameig usaleun zob, saiu tub erunai dumau? Go saiu duabun iborain tam. Enemig unum dabuig gau usaleun zob, sous zumau erunai itu dumam? Go itu duabun iborain tam. ¹⁸Igual enemig guzenai tam, Uwait nugtal gonugau dabeleu eiman enemig ebu ece beu beu salau tutak tutak a mareun. ¹⁹Bo, igual ebeig ta, aramig ta, tutak daremen zob, igual enemig i damau. ²⁰Ig abiu ece beu beu unum tulina, enemig tutak dareu.

²¹Gonun, ameig nug ebeig guzenai aurabun iborain tam, go enamau “Na e ebu i danen, iz sag dai.” Gagalig nug aramig guzenai aurabun iborain tam, go enamau “Na e ebu i danen, iz sag dai.” ²²Tam pet, tam. Ein ece igual enemig ebu dareu igual dabeleu ece go gusig tamacag anem, ece go i darem zob, ig naliu i damam. ²³Ein ece igual enemig ebu darem igual dabeleu go naliu tam, suban gumeimai, iweiu naliu mai muranem. Ece igual enemig ebu ipal darem ig duailen ipal agen piabun aipig nuaneu, go suban gumeimai, kulai maranem. ²⁴Ece ipal igual dabeleu go naliu pet piabun iboin, ig ag suban gumarianem. Bo, Uwait nug igual enemig patai meun. Gonug igual ebeig, aramig, gagalig tularaun. Ece ipal igual dabeleu naliu tam go nug suban gumaraneu. ²⁵Gonun, igual enemig beu beu atalian. Igual enemig tutak sul, aramig, ebeig, gagalig, agzozou subantal isa isanaranem. ²⁶Bo, ece tub mu una, enemig unum mu oi bitanemen. Bo, igual ebeig ta, aremig ta, gagalig ta, dudu ipal agen peimai, wanib wag mebi, go igual enemig unum siksikamau.

²⁷Ag don. Ag unum tulemen, go ag Kristus nugau enib. Ag tutak tutak gonugau enib sul daremen. ²⁸Uwait nugau duailen ula ebu, Uwait nug amegai, Yesus nugau ze oi aidabun dudu tapai mareun. Go koli gonugau ze doimai, awarabun dudu tapai mareun. Kolital, go abai marabun dudu tapai mareun. Guzenaimai, go nug dudu ipal gugeg beu beu mabun tapai mareun. Ipal ebeu dudu kasarabun gusig mareun. Ipal ag duailen isanarabun gusig mareun. Ipal dabeleu naliu duailen ipal gumarabun gusig mareun. Ipal uzanan ze ata atai eim ze mabun mareun. ²⁹Agal dabeleu guzenai ta dudu unum Yesus nugau ze oi aidabun dudu ta? Ag unum Uwait nugau Ze doimai, awarabun dudu ta? Ag unum abai marabun dudu ta? Ag unum gugeg beu beu mabun dudu ta? ³⁰Ag unum

ebeu eg kasarabun gusig mui ta? Ag unum uzan tuban ze ata atai eim ze mabun iboin ta? Ag unum ze go kekulabun iboin ta? Tam pet, tam. Uwait nug dudu tutak tutak agal salau mabun gusig beu beu mareun. ³¹Bo, ag Korin duaillel, ag Ah Wes nugau gusig naliupet pet uabun oiagab alaimai, dabeleu gusig wanemen.

Iz ulis igul naliupet pet tub abai marai. Igul gonug igul ipal unum zilareu.

Igual zaiger en oigeb noumabun en igul.

13 ¹Iz uzanan ipal dudu agal ze ata atai eim mui, Uwait nugau tibur agal ze eim mui duaillel awarai, bo, iz duaillel ipal en izal oiab i noumeun, izal ze go aicer wag dual sul gaul sai u amau. ²Iz Uwait nugau Ze marabun gusig mui, iz dabeleu naliupet pet mui Uwait nugau wagemen ze nugau bigeg abiu maimai, izal oiab petak emin go gusig pet, gonun, iz em manam oi abun iboin, bo, iz duaillel ipal en izal oiab i noumeun, igul go guzenanem gaul manem. ³Iz duaillel ipal izal ecesab unum maranem, izal enim dudu ipal agen ab sil agilabun en maremin, agilebi, noumanai, bo, izal oiab duaillel ipal en i noumeun, iz ecesab naliu tub i wai.

⁴Du in go gonugau zaug en gonugau ougab noumeu, du go gue ougab selai mui, go duaillel ipal ebu igul naliu macaneu, go duaillel ipal agal ecesab en ougab i alaneu, gonugau wanib wag maimai, i siksikaneu. ⁵Go duaillel ipal oiagab eg marabun ze eg i macaneu. Duaillel ipal agen gonugau igul sesamoramam aimai, go nugtal gonugau wanib wag mabun en i dabilaneu. Go pigai aigsisil i aneu. Duaillel ipal agen go ebu igul eg mina, go nug koli ag ebalagab igul eg mabun i dabilaneu. ⁶Du go dudu ipal en ougab noumeu, go ein igul eg duaillel ipal macanemen uligaimai, ougab i siksikaneu, bo, ein tuguai igul go macanemen uligaimai, ougab siksikaneu. ⁷Gonug umkoskos dudu ipal suban gumaraneu, go umkoskos duaillel ipal igul naliu mabun en ougab petak aneu, go umkoskos ougab siksikaimai ein igul naliu dudu ipal agen go ebu mamam aimai, go gumei dacaneu, dudu ipal agen go uhu morona, go umkoskos gusig tapai dacaneu.

⁸Duaillel ipal en oiagab noumabun igul go, i tamamau. Tam pet, tam. Go umkoskos guzentel damau. Bo, Uwait nug ebuan ze dudu agen doimai, awaranemen, igul go umkoskos i damau. Dudu agen ipal uzanan ze ata atai eim ze macanemen, igul go Uwait nug tapelamau. Igual abiu macanem igul han tamamau. ⁹Ulis, ig Uwait nugau Ze bigeg unum i abiu, ig ginaginam sag abiu. Ig Uwait nugau Ze ginaginam sag maranem. ¹⁰Bo, aui ses, Kristus alaimai, ece unum naliu usalaba, ece tutak tutak ig ulis abiu mai darem, go unum tamamau. ¹¹Getal iz mogoi ginampet ebu izal ze, izal dabeleu, mogoi ginaginam agal sul. Ulis iz du banou, iz mogoi

ginaginam agal igul i sesamoranoi. ¹²Ulis, igua Uwait nugau siameg iror ebu pianem sul, ig Uwait suban abe mab tam darem, ziwas aiu ses zumau ziwas ebu, gonugau siameg araog pimam. Ulis, iz go en ginamtal abiu, bo, ziwas go zumau ziwas ebu, iz Uwait nug iz abiu milaneu sul, izan go unum abiu murai.

¹³Ulis, igul ainarai muzmuz darem. Igul go Uwait en oiagab petak anem mui, ecesab go aiu ses zuabun gumanem mui, igual oigeb duail el ipal en noumanem. Bo, igual oigeb duail el ipal en noumanem, igul go banou pet, ipal igul zilareu.

Ig ag Uwait nugau Ze duail el tugui ai awarab.

14 ¹Gonun, agal oiagab duail el ipal en noumabun umkoskos salau gusig macan. Ag Ah Wes nugau gusig beu beu uabun oiagab gusig macan. Bo, igul go Uwait nugau Ze duail el awarabun oiagab gusig pet macan. ²Duair in go ipal uzanan ze eim awaraneu, go gue duail el ipal awarabun tam, go Uwait sag auraneu, einen, du tub nug gonugau ze bigeg abe i macaneu. Go Uwait nugau Ah Wes gonugau gusig sil petak ze wagem eun maraneu. ³Bo, duair in go duail el Uwait nugau Ze agal ze eim awaraneu, du go nugau ze nug duail el go agal oiagab Uwait en gusig maraimai, igul naliu guzenabun oiagab asai maraimai, agal oiagab selai dabun maraneu. ⁴Duair in go ipal uzanan ze eim ze maraneu ze go eim du gonugau ougab Uwait en gusig muraneu, bo, duair in Uwait nugau Ze duail el agal ze eim awaraneu, go nug go Kristen duail el unum han agal oiagab gusig maraneu.

⁵Izal dabeleu guzenai, ag unum ipal uzanan ze eim maranemen go naliu, bo, iz ag Uwait nugau Ze duail el agal ze eim awarabun aimai gusig dabelem. Duair in go Uwait nugau Ze duail el araog awaraneu, gonugau salau nug du go gue ipal uzanan ze eim maraneu gonugau salau zilacorou. Ipal uzanan ze eim Uwait nugau Ze duail el awarabun go iboin tam, bo, dudu ipal ze go koli kekulabun dabi, go iboi, kekulaba, Kristen duail el unum isanaraneu.

⁶O zaiar, ag ze go en suban dabilan. Iz ag waiagab alaimai, ipal uzanan ze ata atai eim awaremin aimai, ze go doimai, abe mabun iboin ta? Tam pet, tam! Ze go nug ag i isanaramau. Bo, iz ze ipal Uwait nug iz araog abai mileun agal ze eim awarai, iz ag dabeleu naliu marai, iz Uwait nugau Ze araog awarai, iz ze tub naliu abai marai, go ag isanarabun iboin. ⁷Ag ecesab go dorog tamacag saiu amau guzent al dabilan. Wag ta, pulel ta, dudu agen gaul wina, ecesab go saiu suban i aneu. Ein kabal wabun gonugau zeu oimai, wag wina, saiu naliu zuna, duail el duanemen. ⁸Go guzent al, malai mabun ziwas ebu, malai mabun aicer suban i saiuцина, malai dudu ag malai mabun ecesab erunai suban mamam? ⁹Ag han guzenai, ag ipal uzanan ze eim duail el i abiu awarebi, ag ze go bigeg

erunai pet dareu abe mamam. Agal ze gaul em ebu numau. ¹⁰Petak pet, em e ebu ze beu beu asiu dareu, bo, go unum bigeg mui. ¹¹Du tub nug iz gonugau ze bigeg i abiu ailaimai iz uzan tuban du amau, izan han go uzan tuban du anai. ¹²Ag han guzenai, ag Uwait nugau Ah Wes nugau gusig beu beu uabun dabeleu gusig macanemen. Gonun, ag Kristen duailel isanarabun Ah Wes gonugau gusig uabun salau gusig macan.

¹³Gonun, du in go ipal uzanan ze maraneu, go ze gue koli kekulabun gusig uabun Uwait auramau. ¹⁴Bo, ag suban dabilan, iz ipal uzanan ze eim Uwait aurai, go izal dorop sag auranem, izal dabeleu gaul dacaneu. ¹⁵Gonun, iz erunai? Iz Uwait aurabun, iz izal ze eim Uwait auremin, izal dorop dabeleu mui unum go auremin, duailel dumam. Iz Uwait ulagwag moroimai, kabal wabun izal dorop dabeleu abai ereg kabal wai. ¹⁶Bo, nait dorop nug uzan tuban ze eim Uwait auramam, du tub go na waunab hobo dareu, erunai doimai, petak amau? Go na ze memen i abiu. ¹⁷Na Uwait 'Ese-e' auranem, go naliu, bo, du tub na waunab hobo dareu go go isanorab tam.

¹⁸Iz Uwait 'Ese-e' aurem, einen, ziwas umkoskos iz ipal uzanan ze eim auranem. Petak, iz ag unum zilacaranem. ¹⁹Bo, duailel Uwait nugau Ze duabun zobu piabun alina, ze ginampet agal ze eim ag duabun sul awarai. Bo, uzan tuban ze asiu ag abiu tam go ag awarabun iboin tam.

²⁰Zaiar, ag mogoi ginaginam agen dabilanem sul i dabilan. Ag mogoi ginaginam igul eg i macanemen sul dan, bo, dudu banban agal dabeleu mui dan. ²¹Uwait nugau kasai ze agau ebu getal Aisaia nug guzenai sikut weun,

“Banou nug aneun, ‘Iz emgasag ipal ebuan dudu izal ze awaremin, agen agal ze eim izal duailel awaramam. Iz emgasag ipal ebuan duailel agal oiagsau eim ag awarai. Iz guzenai, bo, ag izal ze i dumam.’”

Aisaia 28:11,12 ²²Gonun, ipal uzanan ze eim awaranem igul, igul go atai Uwait nugau gusig nug abai marabun guzenaneu. Bo, igul go nug dudu agal oiagab Yesus en petak ab tam Uwait nugau gusig abai maraneu. Bo, Uwait nugau Ze agal ze eim marabun igul duailel goagal oiagab Yesus en petak emen araog abai maraneu.

²³Gonun, zobu piabun ziwas ebu, duailel unum alai gotulina, agen unum uzanan ze ata atai eim awarina, duailel ipal agal oiagab petak ab tam ag han ereg alaimai, ze go beu beu doimai, ze mamam, “Dudu go kar warena, guzenai darem?” ²⁴Bo, ag Uwait nugau Ze araog awarebi, du tub go ougab petak ab tam ta, tub uzaneim an du ta, go zaeim go zumau, ze go nug gonugau ougab zet nug sul waba, go abiu mamau go igul eg macaneu du. Ze go doun nug, gonugau igul unum sisiuramau. ²⁵Gonugau ein igul ougab oug wageimai dareu araog usalamau. Gonun, go taubib waimai, Uwait ulagwag moroimai, awaramau, “Petak pet, Uwait ag abai dareu.”

Zobu piabun igul naliupet.

²⁶O zaiar, iz ag igul go guzenabun awarem, ag zobu piabun alai tulaimai, ag erunamamen? Ag unum salau mui. Du tub go kabal wamau, du tub alai Uwait nugau Ze abai maramau, du tub go ze tub Uwait nug go aureun awaramau, du tub go uzan tuban ze eim ze mamau, du tub go ze koli kekulamau. Ag igul go unum guzenamamen, go Uwait nugau duail el isanaraimai, gusig maramamen. ²⁷Duail el inen ag ipal uzanan ze eim marabun, du asiu agen i maran, aliag ta, dudu ainarai agen ze maramam, go iboi. Ag ze i beu tonoiman. Tub nug ze maziaba, tub nug ses ze mamau. Du tub nug ze go bigeg kekulai mamau. ²⁸Bo, du tub ze go bigeg kekulabun iboin tam aba du go uzan tuban ze eim ze maraneu du i ze mamau, soai damau. Go gonugau dabeleu eiman Uwait iau auramau.

²⁹Uwait nugau Ze doimai, awaranemen dudu aliag ta, ainarai tutak tutak asai ze mina, duail el ipal darem agen ze go suban sisiamam. ³⁰Bo, Uwait nug du tub go ebuhoboi damau, ze awau muraba, du go asai ze maba, amegai ze meun du go soacamau. ³¹Ag unum tutak tutak Uwait nugau Ze duail el marebi, guzenamam, duail el unum ag ze abiu maimai, agal oiagab igul naliu guzenabun asai maramau. ³²Dudu inen ag Uwait nugau Ze duail el maranemen ag agtal agal oiagsau suban gumamamen. ³³⁻³⁴Einen, Uwait go salau unum tugui ai macaneu, go salau ata atai i macaneu. Go ougab selai mui salau macaneu. Gonun, ig gonugau igul sesamorab.

Uwait nugau duail el ipal uzan beu beu gotulanemen sul, agal zobu piabun ziw as ebuh an, ailel ag i ze mamamen, ag soai damamen. Ag utarebi, ag ze i mamamen. Ag dudu agal piagsal damamen. Go igual Zuda agal kasai ze nug guzenai aneun. ³⁵Ailel ag ein ze bigeg i abiu, go abiu mabun agal gamulagar agal zaueim kanabarebi, awaramam. Bo, duail el unum gotulai dabi, air tub nug asai ze mamau, go igul egonou pet.

³⁶Ei, ag Korin uzanan duail el, agal dabeleu Uwait nugau Ze ag eiman bigegweun ta? Agal dabeleu gonugau ze ag ebalagab sag aleun ta? Tam pet, tam. ³⁷Du tub nugau dabeleu iz Uwait nug gonugau ze duail el awarabun gusig mileun ta, Ah Wes nug gusig naliu tub mileun aba, go nug ze e sikut wai marem go Dubanou Ban nugau kasai ze abiu maimai, awaramau. ³⁸Bo, du go izal ze sikut wemin sesamorab tam ag gonugau ze i sesamoramamen.

³⁹O zaiar, gonun, ag agal oiagab duail el Uwait nugau Ze marabun gusig macan. Bo, ag duail el ipal, ipal uzanan ze ata atai eim ze mabun i kuatai ze awaran. ⁴⁰Bo, ag zobu piabun ziw as ebuh, duail el ipal isanarabun dabileiban, igul naliu suban sesamoran.

Kristus go noumaimai, koli waseun ze.

15 ¹O Zaiar, iz ag getal Uwait nugau Ze Naliupet go maremin, doimai, agal oiagab gusig memen, ulis, koli ze go dabilabun

awarem. ²Ag Ze Naliupet go maranemin suban doimai, gusig patebiag, go Uwait nug ag imaraneu. Ag go guzeniamamen, agal oiagab go gaul petak emen.

³Iz Ze Naliupet go amegai awaremin, izacin amegai oimai, ulis ag marem. Ze go bigeg banou. Go Kristus igual igul eg zilagai migabun noumeun. Uwait nugau ze eim getal aneun sultal guzeneun. ⁴Go noumina, ob hemen gil ainarai ebu, go koli awau waseun. Uwait nugau ze nug getal aneun sultal usaleun. ⁵Go asaimai, Pita amegwab usaleun. Guzenaimai, gonugau tapaimareun dudu begurug sag ameagab ebu usaleun. ⁶Guzenaimai, duaille go asiu agal oiagab go en petak emen ameagab ebu usalina, pemenin, agal nanalemen handret tabkwai zilacoroun. Duaille go agal ameag nug go uligemen ipal ulis darem, ipal noumemen. ⁷Guzenaimai, go Zems amegwab usalina, uligeun. Guzenaimai, gonugau ze oi aidanemen dudu unum ameagab ebu usalina, uligemenin. ⁸Duaille agal oiagab petak emen go unum uligai pocina, iz han ameab ulis usalina, pemin. Iz ze oi aidanemen dudu ipal usalemen sul abu go eiman usalab tam.

⁹Uwait nugau ze oi aidanemen dudu ula iz wanim banou tam. Uwait nugau duaille agen iz go Yesus nugau ze oi aidaneu du aimai i ailamam, einen, izan getal duaille agal oiagab Yesus en petak emen eg maranemin. ¹⁰Bo, Uwait nug gonugau ougab naliu eiman iz isanileimai, iz gonugau ze oi aidabun tapai mileun. Uwait nug iz gaul isanilab tam, iz salau gusig pet maimai, Yesus nugau ze oi aidanemen dudu ipal unum zilarai darem. Bo, izal gusig sil salau go mab tam, Uwait nugtal gonugau ougab naliu eiman iz gusig milena, salau go moroi darem. ¹¹Uwait nugau Ze izan marai darem ta, ipal agen marai darem ta, ig go Uwait nugau Ze sag maranem. Ag doimai, oiagab petak acanemen.

Ig unum noumaimai, koli asamam.

¹²Ig Kristus go noumaimai, koli waseun ze awarina, duanemen. Gonun, ag ula dudu ipal agen einen, “Duaille noumanemen ag koli i asamamen.” ze go macanem? ¹³Duaille noumanem koli i asamam ze petak tam aba, go Uwait nug Kristus koli asai murab tam. ¹⁴Uwait nug petak Kristus asai murab tam aba, Uwait nugau Ze naliu en awarai aidarem zebigeg go tamacag, ag go en oiagab petak emen han bigeg tamacag. ¹⁵Ze go gue waseun en awaremun petak tam aba, duaille ipal agen ig Uwait en polu ze manem aimai ze mabun iboin, einen, ig Uwait nug Kristus noumina, koli asai moroun aimai awaranem. Bo, duaille noumemen koli i wasebi go petak, Uwait nug Kristus wasai murab tam. ¹⁶Uwait nug dudu noumanem koli i asai maraneu, ze go petak zob, Uwait nug Kristus koli asai murab tam. ¹⁷Uwait nug Kristus asai murab tam zob, agal oiagab Kristus en petak emen go gaul emen zob, ag agal igul eg ebutal daremen

zob. ¹⁸Guzenaimai, duail el go agal oiagab Kristus en petak aimai, noumemen ag tamemen. Uwait nug ag imarab tam. ¹⁹Ig Kristus en oigeb petak maimai, go nug ig ebiligeb igul naliu migabun gumei darem. Bo, igul naliu go ig ebiligeb guzenabun em e ebu tutak gumei darem, duail el ipal agen ig peigaimai, ze mamam “Bisomagar! Duail el go gaul salau asi u maimai, noumamam.”

²⁰Bo, ze go petak pet. Uwait nug Kristus koli asai meun, go awau wai ebuan ee sul amegai waseun, gonun, ig abiu duail el noumemen unum asai maramau. ²¹Du tutak nug noumabun igul araog meun, guzenaital du tutak nug koli usabun abu usalai meun. ²²Duail el ag Adam eiman usalemen, gonun, ag go sul noumamamen. Igul go sul, duail el ag Kristus dual pezai daremen ag go sul koli awau usamamen. ²³Bo, ag tutak tutak agal usabun ziwas ebutal asamamen. Amegai Kristus awau wai ebuan ee sul waseun. Aiu ses, go koli alaba, gonugau duail el han asamamen. ²⁴Guzenebi, em tamabun ziwas alamau, Kristus nug gumaranemenin dudu banban mui, dudu wanimag a mui, dudu gusig a mui, agal gusig unum eg maramau. Guzenaimai, go nug ece unum gumarabun gonugau memeg, Uwait nugau ebeg ebu muramau. ²⁵Ulis Kristus nug em e gumei damau betei, Uwait nug gonugau iwai zaugul unum zilacaraimai, gonugau arab pigsal maramau. ²⁶Gonugau iwai zaugul unum eg usalaimai, noumebi, go nug noumabun gusig han zilacuramau. ²⁷Einen, Uwait nugau ze nug guzenai aneu, “Uwait nug ece unum gonugau arab pigsal meun.”

Buk Song 8:6

Go araog pet. Uwait nugtal ece unum Kristus nugau arab pigsal meun. Gonun, ig petak abiu, Uwait nugtal go Kristus nugau arab pigsal i dareu. ²⁸Ece go unum Kristus nug gumabun gonugau arab pigsal mina, Kristus nugtal Uwait nugau pigsal damau. Amegai Uwait nug ece unum gonugau nag nugau arab pigsal meun. Bo, ai u ses koli nag nugtal memeg nugau pigsal daimai, Uwait nug ece unum gumamau.

²⁹Ag ulis igul go en dabilan. Dudu ipal zaiagar noumina, agal zaiagar noumemenin isanarabun agal wanimag pataimai, Kristus nugau wanib ebu gagaliag patanem. Dudu ipal agen Uwait nug dudu noumemen koli awau i asai maramau ze manem. Agal ze petak aba dudu go ag zaiagar noumemen en gagaliag patanem ag einen guzenanemen? ³⁰Bo, iz ulis, ig en awarem. Noumemen dudu koli i asamam zob, ig einen umkoskos Uwait nugau Ze marabun uhu oi aidanem? ³¹O zaiar, iz ag petak pet awarem, iz ziwas umkoskos dudu ipal agen iz iwebi, noumanai ta, tam ta, dabeleimai, salau mai darem. Ag unum igual Dubanou Ban, Yesus Kristus dual pezai darem en izal oiab siksikeu, gonun, iz ze go ag ameagab wagemabun iboin tam. ³²Bo, izal dabeleu go, em e ebuan ece en oiab nug noumanem zob, iz e Epesus uzanan dudu ag gaian egun zag sul abai alalaimai, ein ece wai? Ag don, duail el noumanem koli i asanemen zob, ig guzenai ze mab,

“Ig ulis siksikaimai, ee ze mui zab, einen, ig tuaba noumamam.”

Aisaia 22:13

³³Ag dudu ipal utarebi, ag i polumaramam. Ag igul eg macanemen dudu abai tulamamen, dudu go agen agal igul naliu eg maramam. ³⁴Ag agal igul naliu getal macanemen koli dabileiban, igul eg utan. Iz agal aipag nuabun ze e awarem, einen, agal duaillel ipal ag Uwait i abiu.

Igual enimig koli awau asamau, go atai pet.

³⁵Bo, dudu ipal agen guzenai kanabai awaramam, “Dudu noumanem, Uwait nug koli erunai asai maramau? Agal enimag erunai pet usalamam?” ³⁶Go dabeleu tamacag dudu agal ze! Ag abiu, ag ee ug banemen, ee ug go em oug i nuba, walu awau i zumau. ³⁷Go ein ee ug banemen gonugau paiu mui unum i banemen. Ag ee ug tutak banemen. Ag atum ug ta, kulukut ug ta baimai, ag ee ug tutak banemen. ³⁸Bo, Uwait nugtal goagal paiu beu beu usalai maraneu. Gonugtal ug beu beu gonugau paiu beu beu maraneu. ³⁹Enimag unum tutak tam. Dudu agal enimag atai, egun agal enimag atai, meg agal enimag atai, karuk agal enimag atai. ⁴⁰Mesgai wagan ece agal enimag atai, em ebuan ece han agal enimag atai. Bo, Mesgai wagan ece agal iweiu atai, em ebuan ece agal iweiu atai. ⁴¹Am gonugau hilanau atai, geil gonugau hilanau atai, ureb inain tutak tutak goagal hilanau han ata atai.

⁴²Gonun, aiu ses, duaillel noumemen koli asamam, go ee ug sul. Enimag ob hiacaremen go noimai, bilamau, enimag asamau atai go noimai, bilabun iborain tam. ⁴³Enimag ob hiacaremen, go unu mui gusig tamacag, enimag koli wasamau go naliu gusig mui. ⁴⁴Enimag go ob hiacaremen go em ebuan, enimag go asamau go Mesgai wag damau.

Em ebuan enimig dareu, Mesgai wagan enimig han dareu. ⁴⁵Uwait nugau ze getal sikut wai memen, guzenai aneun, “Uwait amegai du tub Adam patai mina, du go gue em e ebu dabun usaleun.” *Stat 2:7* Bo

ulisan Adam go atai pet go nug Mesgai wag awau muzmuz dabun gusig migeun. ⁴⁶Uwait nug amegai Mesgai wagan enimig migab tam, amegai em ebuan enimig migeun. Aiu ses ig Mesgai wagan enimig migamau. ⁴⁷Tutak amegai du Adam go em e ebuan usaleun. Uwait nug em oimai, patai meun. Ulian du koli waseun go Mesgai wagan enib mui. ⁴⁸Em e ebuan duaillel, ag em ebuan patai meun du sul. Bo, Mesgai wagan duaillel ag go Mesgai wagan du sul usalamamen. ⁴⁹Ig ulis go em ebuan du sul darem, guzenaital aiu ses ig Mesgai wagan du dareu sul damam.

⁵⁰O zaiar, iz ag petak pet awarem, em e ebuan duaillel ag em ebuan enimag mui ag Uwait nugau gumaneu uzan Mesgai wag simai, go ebuan ece naliu i umamen, tam pet tam. Ece bilamau nug, ece i bilaneu i umau. ⁵¹Ag don, iz ag wameun ze naliu tub awaramoroi. Ig unum i noumamam, bo, igual enimig koli atai kekulamau. ⁵²Go amecig amuz

palacanem sul pigai guzenamam. Ziwas sespet, balau ulwaba, igul go guzenamau. Balau ulwaba, doiban, noumemen dudu koli usamam, koli eg i umamen, ag unum atai ailamamen. ⁵³Enimag go bilaneu ailaimai, naliu muzmuz damamen. Enimag go noumemen acelaimai, awau muzmuz damamen. ⁵⁴Igul go guzenaba, petak pet ze go Uwait nugau agau ebu dareu petak zou. Go guzenai aneun, “Noumabun gusig Uwait nug unum eg moroimai, zilacoroun.” *Aisaia 25:8*

⁵⁵“Noumabun igul gonugau gusig in zilacorou? Noumabun igul gonugau gusig in mu muraneu?” *Hosea 13:14*

Gonug du tub zalacurabun iborain tam. Ulis gonugau gusig unum waneun. ⁵⁶Noumabun igul gonugau gusig sil duail el go igul eg macanemen mu maraneu. Igul eg gonugau gusig kasai ze go ebuan waneu. ⁵⁷Bo, ig Uwait ‘Ese-e’ auraimai, gonugau wanib wag murab, einen, Uwait nug igual Dubanou Ban, Yesus Kristus palautina, go nug ig gusig migena, ig go malai zilacuranem.

⁵⁸O zaiar, ag izal ug pet sul. Gonun, ag gusig tapai dan. Ag ece ipal utebi, ag igul eg ebu i keuaramau. Ag umkoskos Dubanou Ban nugau salau macan. Einen, ag abiu ag Dubanou Ban dual pezai dabi, agal salau macanemen go i sakamamen.

Pol nug aiwag ipal zaiagar marabun aimai awareun.

16 ¹Iz ulis aiwag go agen gotulai mina, Uwait nugau duail el Zerusalem uzan darem marabun awaramoroi. Iz getal Galesia agaig ebuan duail el agal oiagab petak emen igul go abai maremin sul ag han go igultal sesamoran. ²Ag unum agal salau eiman aiwag wanemen. Guzenina, Ban Zobu ebu ag tutak tutak agal aiwag erunai pet omen atalaiban, ipal agal zaueim macan. Guzenebi, iz alemin, ag aiwag gotulabun salau i mamamen. ³Agtal dudu ipal aiwag go gotulai memen Zerusalem ban uzan oi bitabun tapai maran. Iz ag waiagab alemin, iz agau tub Zerusalem duail el agen dudu go abiu marabun sikut wai maraimai, maremin, oi bitamam. ⁴Bo, izal dabeleu guzenai, iz ban uzan go ebu salau tub mui aba, iz ag abai ereg bitai.

Pol nugau dabeleu.

⁵Iz Masedonia agaig bitai. Iz go eiman beteimai, ag waiagab alai. ⁶Iz ag abai betei ziwas huia dai. Iz i abiu, iz ut malalai ziwas ebu ag abai dai ta, tam ta. Guzenaimai, iz ag utarai unamoroi emin, izal unabun ziwas ebu, ag iz isanilamamen. ⁷Iz ag abai ziwas hogu dabun utem. Uwait Banou nugau dabeleu guzenai, iz go ebu ziwas huia dabun ailaba, iz ag abai ziwas huia dai. Tam aba, tam. ⁸Bo, iz Epesus uzan damin, Pentikos* ziwas zumau. ⁹Einen, Uwait nug e Epesus uzanan duail el isanarabun abu im oiteun. Iz duail el agal oiagab petak abun gusig banou mileun. Bo, dudu ipal agen iz ibail iwai mai darem.

¹⁰Timoti go ag waiagab bitaba, agen go ‘Amban’ auraimai, imaiban suban guman. Ag igul go guzenebi, go i uminamau, einen, go iz Dubanou Ban nugau salau manem sul go nug han mai dareu. ¹¹Gonun, agen du tub utebi, go nug Timoti go du magun aimai, i semuramau. Ag go koli unabun ziwaz ebu suban isanoron. Go koli iz waiab alabun aba, ag go isanorobi, go ougab selai mui alamau, einen, iz go dual zaiger ipal abai ereg alabun gumarai darem.

¹²Ulis iz igual zaicig, Apolos en awaramoroi. Iz go zaiger ipal abai ag alai piarabun gusig auranemin, bo, go ulis ag alai uligarabun ougab siksikab tam. Aiu ses ag alai uligarabun abu daba, go petak alamau.

¹³O zaiar, ag suban pian. Agal oiagab petak emen gusig patan. Ag i uminan, gusig tapai dan. ¹⁴Agal zaiagar en umkoskos oiagab nug noumaiban, isanaran.

¹⁵O zaiar, ag Stephanas gonugau ug mui abiu. Akaia agaig ebu ug go inan oiagab petak emen. Ag Uwait nugau duail el isanarabun sag salau gusig macanemen. ¹⁶Ag igul go guzenanemen dudu agal ze suban sesamorabun aimai gusig awarem. Ag dudu go sul mui, duail el ipal ag abai salau macanemen mui, agal piagsal dan.

¹⁷Stephanas, Portunatus, Akaikus go agen iz alai peilina, izal oiab siksikeu, einen, iz abiu ag unum iz alai peilabun iborain tam. Goagen agal empip oimai, iz alai peilemen. ¹⁸Ag iz isanilemen, gonun, izal oiab naliu usalaneu, getal agenag isanarena, goagal oiagab han naliu usaleun. Ag abiu, dudu guzenanemen ag wanimag a, gonun, agal ze sesamoran.

Pocabun ze.

¹⁹Esia agaig ebuan duail el agal oiagab petak emen agen ag ‘Amban’ ai awarem. Akwila, Prisila dual mui duail el agal oiagab petak emen agen agal zaueim tulaimai, agen Dubanou Ban nugau wanib ebu ag ‘Amban’ ai awarem. ²⁰Igual zaiger iz ibail darem agen han unum ag ‘Amban’ ai awarem. Ag agzozou oiagab noumabun abai marabun ebeag igwai patan.

²¹Iz Pol, iz ‘Amban’ ze e izal ebesil sikut wai marem.

²²Bo, duair in go Dubanou Ban en ougab noumab tam, iz Uwait auremin, go nug duair go eg maramau.

Izan anem, “Dubanou Ban, na alen!”

²³Igual Dubanou Ban, Yesus nug gonugau ougab naliu eiman ag isanaraimai, ag abai damau. ²⁴Ag unum Yesus Kristus dual pezai daremen, gonun, iz ag unum en oiab nug noumaneu. Petak.